

四庫全書

史部

欽定四庫全書

文獻通考卷一百十一

鄱陽馬端臨貴與著

王禮考六

君臣冠冕服章

上古衣毛冒皮後代聖人見鳥獸冠角乃作冠纓黃帝

造旒冕始用布帛

冕者冠之有旒

唐虞以上冠布無綏

綏纓飾

郊特牲太古冠布齋則緇之其綏也孔子曰吾未之聞

也。太古無飾，非時人綏也。雜記曰：大白，緇布之冠，不綏也。大白，即上古白布冠。今喪冠也。齊則緇之者，鬼神尚幽闇也。唐虞以上曰太古。疏：太古之時，其冠唯用白布，常所冠也。若其齊戒，則染之爲緇。今始冠，重古先冠之冠而敝之可也。此重古而冠之耳。三代改制，齊冠不復用也。以白布冠實以爲喪冠也。疏言：緇布之冠，初加暫用，冠之罷，冠則敝棄之可也。以古之齊冠，後世不復用也。周氏曰：緇布冠，加之以綏。孔子以爲吾未之聞，然非天子不議禮，雖孔子亦不得不從。當世之所尚，則冠之加綏，雖非禮，但冠而棄之可也。故曰：冠而敝之，敝有棄意。

黃帝作冕，垂旒，目不邪視也；充續示不聽讒言也。

事出世本

虞書帝曰：予欲觀古人之象，日月星辰，山龍華蟲，作會。

宗彝藻火粉米黼黻絺繡以五采彰施於五色作服汝

明

日月星辰取其照臨也山取其鎮龍取其變華蟲雉取其文會繪也宗彝虎雌取其孝藻水草取其潔火

取其明粉米白米取其養黼若斧形取其斷黻爲兩已相背取其辨絺鄭氏讀爲蕭紵以爲繡也日月至華蟲六者繪之於衣宗彝至黼黻六者繡於裳所謂十二章也衣之六章其序自上而下裳之六章其序自下而上采者青黃赤白黑也色者言施之於繒帛也繪於衣繡於裳皆雜施五采以爲色也汝當明大小尊卑之等差也

有虞氏皇而祭深衣而養老夏后氏收而祭燕衣而養老殷人冔而祭緇衣而養老周人冕而祭元衣而養老

皇冕屬也畫羽飾焉凡冕屬其服皆元上纁下有虞氏
十二章周九章夏殷未聞凡養老之服皆其時與羣臣
燕之服有虞氏質深衣而已夏而改之尚黑而黑衣裳
殷尚白而縞衣裳周則兼用之元衣素服其冠則毋追
章甫委貌也諸侯以天子之燕服爲朝服燕禮曰燕朝
服服是服也王者之後亦以燕服爲之魯季康子朝服
以縞僭宋之禮也天子皮弁以日視朝也質其冠未聞
郊特牲言太古冠布則虞氏或用白布冠也正義曰深
衣謂白布衣故言馬氏曰在祭祀則言冠不言衣言冠
則知有其衣故虞十二章周九章推此則二代可知矣
在養老則言衣不言冠言衣則知有冠故毋追夏后氏
之道也章甫殷道也委貌周道也推此則有虞氏可知
委貌周道也章甫殷道也毋追夏后氏之道也周弁殷
毋夏收三王共皮弁素積

委猶安也言所以安正容貌
章明也殷質言所以表明文

夫也母發聲也追猶推也夏后氏質以其形名之其制之異同未聞弁名出於槃槃大也所以言自光大也尋名出於幬幬覆也所以自覆飾也收言所以收斂髮也其制之異亦未聞

通典有虞氏皇而祭其制無文蓋爵弁之類夏后

氏因之曰收純黑前小後大殷因之曰冔黑而微

白前大後小周因制爵弁

爵弁冕之次

赤而微黑如爵

頭然前小後大三代以來皆廣八寸長尺二寸如

冕無旒皆三十升布爲之士冠禮三加成人服之

陳氏禮書曰鄭氏曰皇冕屬畫羽飾焉周禮掌次

之皇邸樂章之皇舜皆以鳳凰之羽爲之則皇冕
畫羽飾可知也王制以皇收畀對冕言之又孔子
稱禹致美乎黻冕詩稱商之孫子常服黼畀黼畀
云者所謂猶黼冕也然郊特牲與冠禮記云周畀
商畀夏收又以收畀對畀言之夫三王共皮弁素
積夏商而上非無弁也然世之文質煩簡不同故
夏商之用冕者周或用弁而已

又曰周禮有韋弁無爵弁書二人雀弁儀禮禮記

有爵弁無韋弁士之服止於爵弁而荀卿則曰士
韋弁孔安國則曰崔韋弁也則爵弁即韋弁耳又
曰古文弁象形則其制上銳如合手然非如冕也
韋其質也爵其色也士冠禮再加皮弁三加爵弁
而以爵弁爲尊聘禮主卿贊禮服皮弁及歸饗餼
服韋弁而以韋爲敬韎色亦爵色亦赤亦即一物
耳

楊氏曰愚按冕弁之制上得以兼下下不得以兼

上故爵弁皮弁冠弁之服爲上下之通用冠弁委
貌也又曰元冠而其服又分爲二朝服也元端也
而元端之用爲尤多以祭服言之大夫爵弁而祭
於已士爵弁而祭於公此以爵弁爲祭服也少牢
主人朝服筮日朝服以祭特牲元端筮日朝服以
祭此以朝服元端爲祭服也惟皮弁之服不爲祭
服然祭義君皮弁素積朔月月半巡牲是致敬於
祭牲而用皮弁之禮也祭義君皮弁素積卜三宮

之夫人世婦使入於蠶室是致敬於祭服而用皮弁之禮也大學始教皮弁祭菜是致敬於祭菜而用皮弁之禮也及按春官司服士之服自皮弁以下如大夫之服以儀禮士冠士喪考之則皮弁之上有爵弁以司服考之則皮弁之上有韋弁今特云士之服自皮弁而下何也皮弁之用多於爵弁韋弁也蓋人爲者多變自然者不易皮弁因其自然而已此所以三王共皮弁素積而周天子至士

共用之也

按周以前冠冕衣裳之制其詳不可得而聞所可
考者惟虞書言服章戴記言冠制耳然冠之制有
三曰冕曰弁曰冠冕者朝祭之服所謂十二旒九
旒而下是也惟有位者得服之弁亞於冕所謂周
弁殷冔夏收是也冠亞於弁所謂委貌章甫毋追
是也弁與冠自天子至於士皆得服之冕始於黃
帝至有虞氏以爲祭服

所謂皇而祭

夏殷之祭則用弁

蓋未以弁爲殺於冕也至周而等級始嚴故大夫雖可以服冕而私家之祭不得用之天子不妨服弁而雖小祀必以冕蓋冕弁之尊卑始分矣然弁有二曰皮弁以白鹿皮爲之其制最古曰爵弁則其制下員上方如冕而無旒古者冠禮三加始緇布冠次皮弁次爵弁皆士服也大夫則服冕矣古者雖重冠禮而於服章之際視之彌重故雖天子之元子始冠亦服士之冠至爵弁而止而不敢僭

用冕所謂天下無生而貴者其嚴如此

又按冕則卿大夫以上服之而可以兼服弁弁則士以下服之而不可以僭服冕固也然冕服之用非惟位有尊卑不可躡服而事有大小亦不可以例服故天子之冕以之奉祀其次則初即位服之伊尹以冕服奉太甲康王麻冕黼裳是也納后妃服之冕而親迎是也養老服之冕而總干是也躬耕籍田服之冕而朱紘躬秉耒是也至於日視朝

等事則服皮弁而已卿大夫之冕則以之朝王及
助祭其次則受遺奉冊服之卿士邦君麻冕蟻裳
一人冕執劉一人冕執鉞之類是也至其私家則
雖奉祀亦服皮弁而已蓋於其所不當服也則雖
天子之視朝卿大夫之奉祀亦不果服於其所當
服也則雖服之以總干服之以乘耒服之以執劉
執鉞亦無嫌也適禮之宜而已

周官司服掌王之吉凶衣服辨其名物與其用事

用事
祭祀

視朝甸山帛之事
衣服各有所用

王之吉服祀昊天上帝則服大裘而

冕祀五帝亦如之

大裘羊裘冕者首飾尊也祀天尚質正義曰六服服雖不同首同用冕也

享先王則袞冕

袞卷龍衣也虞時冕服十二章自日月至黼黻王者相變至周而以日月星辰

畫於旌旗所謂三辰旂旗昭其明也而冕服九章登龍於山登火於宗彝尊其神明也袞之衣五章裳四章凡

九享先公饗射則鷩冕

先公謂后稷之後太王之前不窟至諸盥享祀賓客與諸侯射

也鷩裨衣也九章初一日龍次二曰山次三曰華蟲次四曰火次五曰宗彝皆畫以爲繪次六曰藻次七曰粉

米次八曰黼次九曰黻皆紵以爲繡袞則九章備鷩冕無龍山畫以雉其衣三章裳四章凡七也正義曰此

無正文並鄭以意解之

祀四望山川則毳冕

毳冕其衣罽衣元謂毳畫虎雌謂宗彝也

其衣三章裳二章凡五章也

祭社稷五祀則希冕

希刺粉米無畫其衣一章裳二章凡

三祭羣小祀則元冕

其衣無文裳刺黻而已冕服皆元衣纁裳

凡兵事韋弁

服

韋弁以韠韋爲弁又以爲衣裳春秋傳晉卻至衣韠之跗注是也

正義曰韋弁即蒔染謂赤色也以赤

色韋爲弁衣裳亦以韠皆赤色

眡朝則皮弁服

視朝視內外朝之事皮弁之服十五升白衣積

素以爲裳王受諸侯朝覲於廟則用衮冕

凡甸冠弁服

甸田獵也冠弁委貌其服緇布衣亦積素

以爲裳諸侯以爲視朝之服

凡凶事服弁服

服弁喪冠也其服斬練齊練正義服弁注云

喪冠色未詳

凡弔事弁經服

弁經者如爵弁而素加環經正義曰如爵弁者爵弁之形以

木爲體廣八寸長尺六寸以三十升布染爲爵頭色亦多黑少今爲弁經之弁其體亦然但不可爵色之布而

用素爲之加環經者凡經皆兩股絞之今以麻爲體又以一股麻爲體糾而橫纏之如環然加於素弁之上

大札大荒大裁素服

大札疫疾也大荒饑饉也大裁水火爲災君臣素服縞冠若晉伯宗

哭梁山之崩

公之服自衮冕而下如王之服侯伯之服自鷩

冕而下如公之服子男之服自毳冕而下如侯伯之服

孤之服自希冕而下如子男之服卿大夫之服自元冕

而下如孤之服士之服自皮弁而下如大夫之服其齋

服有元端素端

自公之衮冕至卿大夫之元冕皆其朝聘天子及助祭之服諸侯非二王後其

餘皆元冕而祭於己雜記曰大夫冕而祭於公弁而祭於己士弁而祭於公冠而祭於己大夫爵弁自祭家廟

唯孫耳其餘皆元冠與士同元冠自祭其廟者其服朝服元端諸侯之自相朝聘皆皮弁服此天子日視朝之服士齋有素端者亦爲札荒有所禱請變素服言素端者明異制鄭司農云衣有襦裳者爲端元謂端者取其正也士之衣袂皆二尺二寸而屬幅是廣袞等也其袪尺二寸大夫已上侈之侈之者蓋半而益一則其袪三尺三寸袪尺八寸正義曰魯祭服亦得與天子同然唯在文王周公廟中得用袞冕其二王後惟祭受命王得用袞冕其餘廟亦用元冕也云雜記曰大夫冕而祭於公至元冠與士同者諸侯除孤用爵弁之外卿大夫皆用元冠與士同故少牢是上大夫祭用元冠朝服特牲是士禮用元冠元端是餘皆元冠與士同也云諸侯之自相朝聘皆皮弁者欲見此經上服惟施於入天子廟不得入諸侯廟之意必知諸侯自相朝聘用皮弁者見聘禮主君及賓皆皮弁諸侯相朝其服雖無文聘禮主君待聘者皮弁明侍諸侯朝亦皮弁可知云此天子

視朝之服者此解皮弁非諸侯常服之物惟於朝聘乃服之意也

林氏曰黃帝始備衣裳之制舜觀古人之象繪日月星辰山龍華蟲於衣繡宗彝藻火粉米黼黻於裳以法乾坤以昭象物所以彰天子之盛德能備此十二物者也使服者當須有是服之盛德焉繪以三辰所以則天之明尤爲君德之光自黃帝以來歷代之制莫不然也周人特備以旂纛之數爾周禮乃無十二章之文司服惟有衮冕至元冕說

者謂周登三辰於旗冕服惟有九章嗚呼何說之
異也自堯舜至於三代文物日以盛名分日以嚴
儀章日以著夫子於四代禮樂特曰服周之冕取
其文之備尊卑之有辨也何得至周反去三辰之
飾文乃不足乎蓋不過據左氏三辰旂旗之文左
氏謂旗有三辰何嘗謂衣無三辰邪豈有王者象
三辰之明歷代皆飾於衣周人特飾於旗有何意
乎况又謂上公冕服九章而王服亦九章將何所

別周公制禮防亂萬世乃至於無別與郊特牲曰
祭之日王被袞以象天則十二章備矣鄭氏曰謂
有日月星辰之章此魯禮也夫被袞以象天周制
固然也何魯之足云豈有周制止九章魯乃加以
十二章之禮乎

宋兩朝輿服志皇祐三年詔問冠章弁何服所執
何玉太常禮院奏謂周禮司服凡兵事章弁服釋
之者曰章弁以韎韁爲弁又以爲衣裳春秋傳晉

卻至衣韎韁之跗注是也今伍伯緹衣古兵服之遺色孔穎達以韎舊染謂以赤色韁爲弁杜佑通典韁弁之制晉以韁爲之頂少尖宋因之爲車駕親戎中外戒嚴之服後周巡兵卽戎則服之自此以來無復其制三禮圖韁弁服王及諸侯卿大夫之兵服天子亦以五采玉十二節之詳此則韁弁服蓋天子諸侯卿大夫臨戎所通服古者非祭祀朝聘會同不執玉今韁弁旣爲戎服於經無執玉

之文而三禮圖繪爲執玉斯一時之誤不足爲據也

弁師

弁者古冠之大稱

掌王之五冕皆元冕朱裏延紐

冕服有六而言

五冕者大裘之冕蓋無旒不聯數也延冕之覆在上是以名焉紐小鼻在武上弁所貫也疏曰云皆元冕者古者績麻三十升升染之上以元下以朱衣之於冕之上下云延者即是上元云紐者綴於冕之兩傍垂之武兩傍作孔以筭貫之使得其牢固也凡冕體周禮無文叔孫通作漢禮器制度取法於周案彼文凡冕以版廣八寸長尺六寸上元下朱覆之乃以五采縹繩貫五采玉垂於延前後謂之遽延故玉藻云天子玉藻前後遽延龍卷以祭是也又曰爵弁前後平則得弁稱冕則前低一寸得冕名冕則僂也

五采縹十有

二就皆五采玉十有二玉筭朱紃

紃音早 繅雜文之名也合五采絲爲之

繩垂於廷之下前後各十二所謂邃廷也就成也繩之每一匝而貫五采玉十二筭則十二玉也每就間蓋一寸朱紃以朱組爲紃也紃一條屬兩端於武繅不言皆有 不皆者此爲袞衣之冕十二筭則用玉二百八十八驚衣之冕繅九筭用玉二百一十六毳衣之冕七筭用玉百六十八希衣之冕五筭用玉百二十元衣之冕三筭用玉七十二 筭音留 疏曰云紃一條屬兩端於武者謂以一條紃先屬一頭於左旁筭上以一頭繞於頤下至向上於右屬筭上繞之是以鄭注士冠禮云有筭者屈組以爲紃垂爲飾無筭者纓而結其條彼有筭據皮弁爵弁此五冕皆有筭與彼同此言屬於武者據筭貫武故以武言之其實在筭云繅不言皆有不皆者謂王之五冕繅則有十二有九有七有五有三其玉旒皆十二故不言皆有不皆者則九旒已下是也玉言皆

則五冕旒皆十二玉也此經十二旒據衮冕而言是以鄭云此爲衮衣之冕以其十二旒旒各十二玉前後二十四旒故用二百八十八玉已下計可知諸侯之纁旒九就瑇玉三采其餘

如王之事纁旒皆就玉瑇玉笄

瑇本又作珽亡貧反瑇吐練反侯當爲公字之

誤也三采朱白蒼也其餘謂延紐皆元覆朱裏與王同也出此則異纁旒皆就皆三采也每纁九成則九旒也公之冕用玉百六十二玉瑇塞耳者故書珽作瑇鄭司農云纁當爲藻纁古字也藻今字也同音瑇惡玉名瑇音無疏曰諸公云纁九就又云纁旒皆就文與上言纁十有二就皆五采玉十有二纁玉別文則纁有差降玉無差降此諸公纁玉同則唯一冕而已故鄭注一冕爲九旒旒各九玉據冕九旒不別計驚冕已下以其一冕而冠五服也已下侯伯子男亦皆一冕冠數服也王不言玉瑇於此言之者王與諸侯互見爲義是以

王言元冕朱裏延紐及朱紘明諸侯亦有之諸公言玉
瑱明王亦有之是其互有也又曰知三采朱白蒼者聘
禮記公侯伯繅藉三采朱白蒼故知也云出此則異者
異謂天子朱紘諸侯當青紐紘之等不得與王同也

王之皮弁會五采玉璫象抵玉笄

鄭司農云會謂以五采束髮元謂會縫中

也璫讀如綦綦結也皮弁之縫中每貫結五采玉十二
以爲飾謂之綦詩云會弁如星又曰其弁伊綦抵下抵
也以象骨爲之疏曰會取會聚之義故爲縫中天子
以十二爲節約同冕旒也弁之縫中飾之以玉璫璫而
處狀如星故曰會弁如星云抵下抵也者謂爲弁內頂上以象骨爲抵諸侯及孤卿大夫

之冕韋弁皮弁各以其等爲之而掌其禁令

各以其等璫旒玉璫

如其命數也冕則侯伯繅七就用玉九十八子男繅五
就用玉五十繅玉皆三采孤繅四就用玉三十二三命

之卿繅三就用玉十八再命之大夫藻再就用玉八藻
玉皆朱綠韋弁皮弁則侯伯璆飾七子男璆飾五玉亦
三采珮則璆飾四三命之卿璆飾三再命之大夫璆飾
二玉亦二采一命之大夫冕而無旒士變爲爵弁其韋
弁皮弁之會無結飾禁令者不得相僭踰也疏曰云
一命之大夫冕而無旒者凡冕旒所以爲文飾一命若
有則止一旒一玉而已非華美爵弁之制如冕而無旒
則一命之冕與爵弁不殊得謂之冕者蓋弁則前後平
冕則前低一寸餘

陳氏曰司服之服六而弁師之冕五者大裘衮衣
同冕猶后首服同副也

又曰弁師王之五冕皆朱紘禮記天子爲藉冕而

朱紘諸侯爲藉冕而青紘士冠禮緇衣冠青組纓
皮弁笄爵弁笄緇組紘纁邊蓋朱者正陽之色天
子以爲紘青者少陽之色諸侯以爲紘緇者陰之
色而士以爲紘卿大夫冕弁之紘無所經見禮器
曰管仲鏤簋朱紘君子以爲濫鄭氏謂大夫士當
緇組紘纁邊理或然也一組繫於左笄遶頤而上
屬於右笄垂餘以爲飾謂之二紘又曰冕約之以
武設之以紐貫之以笄固之以紘

又曰瑱以充耳統以垂瑱周官弁師王之五冕皆玉瑱詩於衛夫人言玉之瑱也於衛武公言充耳琇瑩於衛之臣子言褻如充耳齊詩言充耳以素以青以黃尚之以瓊華瓊瑩瓊英則瑱不特施於男子也婦人亦有之不特施於冕也弁亦有之故詩言充耳琇瑩繼之以會弁如星喪禮士無冕而瑱用白纁則弁亦有之可知也士瑱用白纁即詩所謂充耳以素者也人君用黼纁即詩所謂充耳

以黃者也毛氏以充耳以素爲士之服充耳以青爲卿大夫之服充耳以黃爲人君之服其說是也春秋傳曰縛之如一瑱則縛纁以爲瑱自古然也其制蓋皆元統以垂之瓊玉以承之承之詩所謂尚之也檀弓小祥用角瑱楚語曰巴浦之犀犛兕象其可盡乎則古者之瑱亦以象與角爲之又曰周官追師掌王后之首服爲副編次追衡筭左傳曰衡紘紘紘昭其度也鄭司農曰衡維持冠者鄭

康成曰王后之衡筭皆玉爲之惟祭服有衡垂於副之兩旁當耳其下以紃垂瑱孔穎達曰婦人首服有衡則男子首服亦然王后之衡以玉諸侯以下未聞然則左傳言衡則繼以紃弁師士冠禮言筭則繼以紃

朱子曰禮家載祀先王服衮冕祀先公服鷩冕諸侯之服蓋雖上祀先公以天子之禮然不敢以天子之服臨其先公但鷩冕旒玉與諸侯不同天子

之旒十二玉蓋雖與諸侯同是九旒但天子九旒十二玉諸侯九旒九玉耳

楊氏曰愚按六服而冕注說恐未安當從陳氏大裘衮衣同冕之說蓋祀天祀先王皆十二旒旒十二玉祀先公驚冕則九旒旒十二玉祀四望山川義冕則七旒旒十二玉禮有輕重則縹旒有隆殺惟祀天祀先王皆致其隆不容有所輕重也

按先儒疑服有六而冕止於五遂謂大裘衮衣二

服而同冕然按郊特牲祭之日王被袞以象天玉藻天子龍卷以祭家語曰郊之日天子大裘以黼之被裘象天既至泰壇王脫裘矣服袞以臨燔柴戴冕璪十有二旒則天數也陳祥道以爲王之祀天內服大裘外被龍袞龍袞所以襲大裘也然則祭天之服亦龍袞特內襲大裘而宗廟之祭則龍袞內無裘故以大裘而冕在袞冕之前非謂袞冕之上復有大裘之服也蓋大裘袞衣不可分而爲

二服而服與冕皆五未嘗有六服矣禮家又謂大
裘之冕無旒如此則是以大裘爲一服無旒者爲
一冕是有六服亦有六冕然冕之無旒者乃一命
之服蓋子男之國爲大夫者服之其秩至卑以天
子祀天之冕而下同於子男之大夫可乎其義不
通矣

天子玉藻十有二旒前後邃延龍卷以祭

祭先王之服
雜采曰藻天

子以五采藻爲旒旒十有二前後邃延者言皆出冕前
後而垂也天子齊肩延冕上覆也元表纁裏龍卷畫龍

於衣或作袞 疏曰藻謂雜采之絲繩以貫於玉以玉飾藻故云玉藻前後各十二旒垂而深邃延卷謂卷曲畫此龍形云天子齊肩者以天子之旒十二就每一就以玉就間相去一寸則旒長尺二寸故垂而齊肩言天子齊肩則諸侯以下各有差降則九玉者九寸七玉者七寸以下各依旒數垂而長短爲差旒垂五采玉依飾射侯之次從上而下初以朱次白次蒼次黃次元五采玉既貫遍周而復始其三采者先朱次白次蒼二色者先朱後綠皇氏沈氏並爲此說今依用焉後至漢明帝時用曹褒之說皆用白旒珠與古異也云延冕覆者用三十升之布染之爲元覆於冕上出而前後冕謂以板爲之以延覆上故云延冕上覆也但延之與板相着爲一延覆在上 元端而朝日於東門之外聽朔於南門之故云延冕也

外端當爲冕元衣而冕冕服之下朝日春分之時也東門南門謂國門也天子廟及路寢皆如明堂在國之

陽每月就其室之堂而聽朔焉卒事反宿路寢亦如之
閏月聽其朔於明堂門中還處寢門終月凡聽朔必以
特牲告其帝及神配以文王武王疏曰案下諸侯皮
弁聽朔朝服視朝是視朝之服卑於聽朔聽朔大視朝
小故知端當爲冕元冕祭小祀日月爲中祀而用之者
以天神尚質魯語云大采朝日故於日韋昭注大采謂
元冕也春分日皮弁以日視朝遂以食日中而餽卒食
於其日朝之

元端而居

天子服元端燕居也

疏曰遂以食者既著

故著朝服至日中之時還著皮弁而餽朝之餘食沙

隨程氏曰先儒相傳謂前旒蔽明

旒纁塞聰亦習之誤

此獨祭祀之袞冕爲然欲其專精神以

享也君視朝則皮弁服何旒纁之有哉

諸侯元端以祭

祭先君也端亦當爲冕諸侯

祭宗廟之服唯魯與天子同

裨冕以朝朝天子也裨冕

男義也

皮弁以聽朔於太廟

皮弁下天子也

朝服以日視朝於內

朝

朝服冠元端素裳也此內朝路寢門外之正朝也天子諸侯皆三朝

朝辨色始入

羣臣也入

入應門也辨猶正也別也

君日出而視之退適路寢聽政使人視大

夫大夫退然後適小寢釋服

小寢燕寢也釋服釋元端

又朝服以食

特牲三俎祭肺

養食必復朝服所以敬養身也三俎豕魚腊

夕深衣祭牢肉

祭牢

肉異於始殺也言牢肉互相挾

天子言日中諸侯言夕天子言餽諸侯正義曰元端賤於皮弁下文皮弁聽

朔於太廟不應元端以祭先君故知此端亦當爲冕覲禮云侯氏裨冕鄭注裨之爲言埤也天子六服大裘爲

上其餘爲裨故總云裨冕王制云周人元衣而養老注云元衣素裳天子之燕服爲諸侯朝服彼注云元衣則

此元端也若素爲裳則
是朝服此皆爲元端

周禮司服其齋服有元端素端

注見前

內則曰子事父母

冠綏纓端韠紳

端元端士服也

玉藻天子元端而朝日於東門

之外

端當爲冕

卒食元端而居諸侯元端以祭

端亦當爲冕

朝元

端夕深夜

謂大夫士也

無君者不二采

大夫去位宜服元端素衣

小記除

殤之喪者其祭也必元

冠元端黃裳而祭不朝服未純吉也於成人爲釋禫之服

樂

記魏文侯問於子夏曰吾端冕而聽古樂則惟恐卧

元端

衣雜記曰端纁喪車皆無等

喪者衣纁及所乘之車貴賤同衣纁言端者元端吉

時常服喪之衣衣線當如之子羔之襲素端一公襲卷衣一元端一儀

禮士冠緇布冠元端元裳黃裳雜裳可也緇帶爵韠

此暮

夕於朝之服元端則朝服之衣易其裳耳上士元裳中士黃裳下士雜裳賓如主人服贊者

元端從之冠者既冠乃易服服元冠元端爵韠見於君

見於鄉大夫鄉先生

見服不朝服者非朝士也

特牲饋食禮主人冠

元端論語公西華曰宗廟之事如會同端章甫願爲小

相焉荀卿曰端衣元裳紼而乘路志不在於食葷大戴

禮曰武王端冕而受丹書左氏劉定公曰吾端委以治

民臨諸侯禹之力也晏平仲端委以立於虎門晉語董

安于曰臣端委以隨宰人周語曰晉侯端委以入武宮

韋昭曰此士服也諸侯之子未受爵命服士服也

穀梁曰免牲者爲之緇衣纁

裳有司元端奉迎至於南郊

襄三十一年

吳夷狄之國也被

髮文身欲因魯而請冠端而襲

襲衣冠端元端

鄭氏釋士冠禮

謂爵弁純衣絲衣也餘衣皆用布惟冕與爵弁用絲耳

賈公彥曰此據朝服皮弁服元端服及深衣長衣之等

皆布爲之是以雜記云朝服十五升布元端亦朝服之

類皮弁亦是天子朝服深衣或名麻衣故知用布也

陳氏禮書曰司服言及諸侯孤卿大夫士之服而繼之以其齋服有元端素端則元端素端非特士之齋服而已鄭氏曰端者取其正也士之衣袂皆二尺二寸而屬幅是廣袂等也其袪尺二寸大夫以上侈之侈之者蓋半而益一則其袂三尺三寸袪尺八寸然謂之端則衣袂與袪廣袂等矣無大夫士之辨也果士之袪殺於袂尺非端也大夫之

袪侈以半而益一亦非端也深衣之袪圜長衣之

袪長弔祭及餘衣之袪侈

司服凡弔事弁經服雜記凡弁經服其緣侈少

牢主婦衣宵衣侈袂儒行曰孔子衣逢掖之衣荀卿曰其衣逢

則元端之袂端可

知矣古者端衣或施之於冕或施之於冠大戴記

曰武王端冕而受丹書樂記曰魏文侯端冕而聽

古樂荀卿曰端衣元裳纁而乘路此施於冕者也

冠禮冠者元端緇布冠既冠易服服元冠元端特

牲禮主人冠端元內則子事父母冠綏纓端韡紳

劉定公曰吾端委以治民董安于曰臣端委以隨
宰人公西華曰宗廟之事如會同端章甫以至晉
侯端委以入武宮晏平仲端委以立於虎門此施
之於冠者也蓋元端齋服也諸侯與士以爲祭服
玉藻元端以祭特牲冠端元是也大夫士以爲私
朝之服玉藻朝元端是也天子至士亦以爲燕服
玉藻天子卒食元端而居內則事父母端韞是也
然則端衣所用固不一矣記曰齋之元也以陰幽

思也故祭之冕服皆元齋之端衣亦元若夫朝服
天子以素諸侯以緇未聞以元端也儀禮大夫祭
以朝服士祭以元端冠禮主人朝服既冠冠者服
元端雜記公襲朝服一元端一毳禮自西階受朝
服自堂受元端則朝元端異矣元端皆元裳或黃
裳雜裳可也鄭氏曰上士元裳中士黃裳下士雜
裳前元後黃荀卿曰端衣元裳繞而
乘路志不在於食葷蓋齋則未聞以素裳也鄭氏
衣裳皆元非齋則裳不必元釋儀禮謂云端即朝服之衣易其裳耳釋玉藻曰

朝服冠元端素裳此說無據服元端者冠則緇布冠齋則元冠特天子齋用冕燕則元冠而已然齋或用素端則其冠不元矣鄭氏曰素端爲禮荒有所禱請是也

又曰元端齋服也天子以爲燕服士以爲祭服大夫士以爲私朝之服或以事親或以擯相或既冠則服之以見鄉大夫鄉先生凡書傳所謂委貌者即此元端委貌也如晉侯端委以入武宮劉定公

曰吾端委以治民臨諸侯晏平仲端委以立於虎門之外是也則元端之所用爲尤多矣

朱子曰不學雜服不能安禮鄭注謂以服爲皮弁冕服其說恐是蓋古人服各有等降若理會得雜裳則於禮亦是思過半矣且如冕服是天子祭服皮弁是天子朝服諸侯助祭於天子則服冕服自祭於其廟則服元冕大夫助祭於諸侯則服元冕自祭於其廟則服皮弁又如天子常服則服皮弁

朔旦則服元冕無旒之冕也諸侯常朝則服朝服

元衣素裳朔旦則服皮弁大夫私朝亦用元端夕深衣

士則元端以祭上士元裳中士黃裳下士雜裳前後

元黃庶人深衣

古者深衣蓋有制度以應規矩繩權衡聖人制事必有法度短毋

見膚

衣取蔽也

長毋被土

爲汚辱也

續衽鉤邊

續猶屬也衽在裳旁者也屬連之不

殊裳前後鉤邊若今曲裾也續或爲裕

要縫半下

三分要中減一以益下下宜寬也要或爲優

袼之高下可以運肘

肘不能出入袼衣袼當掖之縫也

袼之長短反詘

之及肘

袂屬幅於衣詘而至肘當臂中爲節臂骨上帶

下毋厭髀上毋厭脅當無骨者

當骨緩急難爲中也

制十有二幅

以應十有二月

裳六幅幅分之殺

袂圓以應規

謂胡下也

垂曰曲袷如矩以應方

袷交領也

古者方領如小兒

言似三代以前人反如今服上領衣但方裁之耳案上

領衣本出胡服須用結紐乃可服不知古人有此否也

鄭註周禮袷狀如著橫銜之繡潔於項顏師古註漢書

結紐也繡音獲潔音結漢時小兒衣服既不可見而後

漢馬援傳朱勃衣方領能矩步註引前書音義曰頸下

施衿領正方學者之服也如此則自於頸下別施一衿

映所交領使之方正

今朝服有方心曲領以白羅爲之

次定四章全書

文獻通考

二

方二寸許綴於國領之上以繫於頸後結之或者裕之遺象歟又今小兒疊方幅係於頸下謂之涎衣與鄭說頗相符然事當闕疑未可決從也後漢儒林傳曰服方領習矩步者委蛇乎其中註方領直領也春秋傳叔向曰衣有裕杜曰裕領會也工外反曲禮曰視不上於裕鄭曰裕交領也然則領之交會處自方即謂裕疑更無他物今且從負繩及踝以應直

繩謂繫與後幅相當之縫也踝跟也正義曰

衣之背縫及裳之背縫上下相當如繩之正直故云負繩非謂實負繩也

下齊如權衡以應

平齊故規者行舉手以爲容

行舉手謂揖遜

負繩抱方者以直

其正方其義也故易曰坤六二之動直以方也下齊如

權衡者以安志而平心也

心平志安行乃正或低或昂則心有異志者歟

五法

已施故聖人服之

言非法不服也

故規矩取其無私繩取其直

權衡取其平故先王貴之故可以爲文可以爲武可以

擯相可以治軍旅完且弗費善衣之次也

完且弗費言可善衣而易

有也深衣用十五升布鍛濯灰治純之以采善衣朝祭

之服也自士以上深衣爲之次廢人吉服深衣而已

正義曰可善衣而易有也謂其完牢乃可於善事衣著

故廢人服之以完牢故也而易有者以白布爲之不須

黼黻錦繡之屬云自士以上深衣爲之次者案玉藻諸

侯夕深衣祭牢肉及大夫士朝元端夕深衣是深衣爲

朝服之次也諸侯之下自深衣以後其別更無所謂餘服故知是爲廢人之吉服也

具父母大父

母衣純以續具父母衣純以青如孤子衣純以素

尊者存以

多飾爲孝績畫文也
三十以下無父稱孤
純袂緣純邊廣各寸半
純謂緣之也緣袂謂

其口緣袂也緣邊衣裳之側廣各寸
半則表裏共三寸矣唯袷廣二寸

陸氏曰名曰深衣者謂連衣裳而純之以采也有
表則謂之中衣以素純則曰長衣正義曰長衣中
衣及深衣其制度同玉藻云長中繼揜尺若深衣
則緣而已諸侯大夫爲夕服庶人吉服皆著之在
表也其中衣則在朝服祭服喪祭之下餘服則上
衣下不相連此深衣衣裳相連被體深邃故謂之

深衣

藍田呂氏曰深衣之用上下不嫌同名吉凶不嫌同制男女不嫌同服諸侯朝朝服夕深衣大夫士朝元端夕深衣庶人衣吉服深衣而已此上下之同也有虞氏深衣而養老諸侯大夫夕皆深衣將軍文子除喪而受越人弔練冠深衣親迎女在塗壻之父母死深衣縞總以趨喪此吉凶男女之同也蓋深衣者簡便之服雖不經見推其義類則非

朝祭皆可服之故曰可以爲文可以爲武可以擯相可以治軍旅也

按三代時衣服之制其可考見者雖不一然除冕服之外惟元端深衣二者其用最廣元端則自天子至士皆可服之蓋元端者國家之命服也深衣者聖賢之法服也然元端雖曰命服而本無等級非若冕弁之服上下截然者之比故天子服之而不卑士服之而

不爲僭至於深衣則裁製縫袪動合禮法故賤者可服貴者亦可服朝廷可服燕私亦可服天子服之以養老諸侯服之以祭膳卿大夫士服之以夕視私朝庶人服之以賓祭蓋亦未嘗有等級也古人衣服之制不復存獨深衣則戴記言之甚備然其制雖具存而後世苟有服之者非以詭異貽譏則以儒緩取哂雖康節大賢亦有今人不敢服古衣之說司馬溫公必居獨樂園而後服之呂榮陽

朱文公必休致而後服之然則三君子當居官蒞職見用於世之時亦不敢服此以取駭於俗觀也蓋例以物外高人之野服視之矣可勝慨哉

右衣冠之制

有虞氏服韍夏后氏山殷火周龍章

韍或作黻音弗韍冕服之韍也舜始

作之以尊祭服禹湯至周增以畫文後王彌飾也山取其仁可仰火取其明龍取其變化天子備焉諸侯火而下卿大夫山士韍韋而已韍莫拜反疏曰士冠禮士韍韋是士無飾推此即尊者飾多有此四等天子至士亦爲四等故知卿大夫加
山諸侯加火天子加龍
韠君朱大夫素士爵韋

韠音必

此元端服之鞞也鞞之言蔽也凡鞞以韋爲之必象裳色則天子諸侯元端朱裳大夫素裳唯士元裳黃裳雜裳也皮弁服皆素鞞疏曰知此元端服之鞞也者案士冠禮元端元裳黃裳雜裳爵鞞謂士元端之鞞比云爵韋故知元端之鞞也云皮弁服皆素鞞者案士冠禮皮弁服素鞞云皆者君與大夫士皮弁皆然故云皆也

圓殺直

方後挫角則圓也經云殺則下文公侯前後方

則殺也經云直則下文天子直是目鞞制也

天子直

無圓殺公侯前後方

角使之方變於天子也所殺者去上下各五寸疏曰云所殺者去上下各五寸者案雜記云鞞會去上五寸

是上去五寸又云紕以爵韋六寸不至下五寸是去下五寸

大夫前方後挫角

圓其上角

變於君也鞞以下爲前

士前後正

士賤與君同不嫌也以上爲後挫作卧反

子之士則直諸侯之士則方疏曰正謂不袞也直而不袞謂之正方而不袞亦謂之正故云正直方之間語

也
鞞下廣二尺上廣一尺長三尺其頸五寸肩革帶博

二寸

頸五寸亦謂廣也頸中央肩兩角皆上接革帶以繫之肩革帶廣同凡佩繫於革帶玉藻雜記

鞞長三尺下廣二尺上廣一尺會去上五寸純以爵韋六寸不至下五寸純以素紃以五采注曰會謂領上縫也領之所用蓋與紃同在旁曰紃在下曰純素生帛也紃六寸者中執之表裏各三寸也純紃所不至者五寸與會去上同紃施諸縫中若今時緜也疏曰鞞長三尺與紃齊也下廣上狹象天地數也會謂鞞之領縫也此縫去鞞上畔廣五寸紃以爵韋六寸者謂會縫之下兩旁縫以爵韋濶六寸倒攝之兩廂各三寸也不至下五寸者謂紃鞞之兩邊不至之處橫紃之以生帛此帛上下素謂生帛謂紃所不至之處橫紃之以生帛此帛上下

亦潤五寸紉條者謂五
采之條置於諸縫之中
一命縕韍幽衡再命赤韍幽衡

三命赤韍葱衡

此元冕爵弁服之韍尊祭服異其名耳
韍之言亦蔽也縕赤黃之間色所謂韍

也衡注見後佩玉條周禮公侯伯之卿三命其大夫再
命其士一命子男之卿再命其大夫一命其士不命

疏曰以上經云君朱大夫素士爵韋是元端服之韍故
云此元冕爵弁服之韍言異於上也此據有孤之國以

卿大夫雖三命再命皆著元冕若無祫之國則三命再
命之卿大夫皆著絺冕不得爲元冕也爵弁則士所服

云一命縕韍者一命公侯伯之上士冠爵弁韍韍此縕
韍則當彼韍韍韍毛詩云韍韍茅蒐茅蒐則蒨草也以蒨

染之其色淺赤則
縕爲赤黃之間色

陳氏禮書曰韍之作也在衣之先其服也在衣之

後其色則視裳而已禮記言君朱大夫素士爵韋
者祭服之韠也蓋君祭以冕服冕服元衣纁裳故
朱韠大夫祭以朝服緇衣素裳故素韠士祭以元
端元裳黃裳雜裳可也故爵韠周官典命公侯伯

之士一命而士之助祭以爵弁

弁而祭於公

爵弁纁裳

故纁韠

纁赤黃之間色

所謂一命纁韠是也公侯伯之卿

三命大夫再命而卿大夫助祭聘王以元冕

司服之

服自希冕而下鄭氏以爲卿大夫之服自元冕而下鄭氏以爲助祭聘王之服蓋祫希冕祭於公弁

而祭於已卿大夫元冕
祭於公冠而祭於已

元冕纁裳故赤韍所謂再

命三命赤韍是也韠之爲物以其第前則曰韍以

其一巾足矣故曰韠以色則曰緼以緼質則曰韎

韠

古人謂舊爲茅蒐
讀茅蒐爲韎韠

考之士冠禮於皮弁元端皆

言韠特於爵弁言韎韠詩於素韠於朱弁赤弁乃

言弁是韠者弁之通稱而弁與韎韠異於名所以

尊祭服也君韠雖以朱而諸侯朝王亦赤弁在股

赤弁金舄是也士雖以爵凡君子之齋服皆爵韠

記曰齋則綰結佩而爵韞是也采芑言方叔之將
兵韞亦以朱瞻彼洛矣言作六師而韞以韞韞者
蓋兵事韞弁服纁裳故貴者以朱芾卑者以韞韞
韞韞即所謂緼韞長三尺所以象三才頸五寸所
以象五行下廣二尺象地也上廣一尺象天也會
去上五寸紕以爵韞六寸不至下五寸純以素紕
以五采會猶書所謂作會也紕裨其上與旁也純
緣其下也去會與純各五寸則其中餘二尺也紕

六寸則表裏各三寸也天子之鞵直其會龍火與
山諸侯前後方其會火以下大夫前方挫角其會
山而已鄭氏謂山取其仁火取其明龍取其變天
子備焉諸侯火而下卿大夫山士韍韋以禮推之
周人多以近世之禮待貴者遠世之禮待卑者則
鄭氏之說是也周以虞庠爲小學以夏序商學爲
太學以成人棺槨喪長殯以夏之
聖周葬中殯以虞氏之瓦棺葬
無服之殯皆待卑者以質畧也自頸肩而下則其
身也鄭氏以其身之五寸爲領而會爲領縫是肩

在領上矣衣之上韋猶尊上元酒俎上生魚也鄭氏謂衣之上韋者執事以蔽裳爲敬與不忘其本之說戾矣古者喪服用韋無所經見詩曰庶見素韋是祥祭有韋也劉熙曰韋以蔽前婦人蔽膝亦如之唐志婦人蔽膝皆如其夫是婦人有韋也荀子曰共艾畢說者曰蒼白之韋是罪人有韋也及戰國連兵韋非兵飾去之明帝復制韋天子赤皮蔽膝魏晉以來用絳紗爲之故字或作紱

徐廣車儀制云

楊氏曰愚按儀禮士皮弁素韠朝服緇韠元端爵韠爵弁韠韠士冠筮於廟門主人朝服緇帶素韠又云冠禮三加爵弁韠韠鄭注云韠韠緇韠也士緇韠而幽衡合韋爲之士染以茅蒐因以名焉今齊人名蒨爲韠韠韠之制似韠又按周官典命一命緇韠蓋公侯伯之士一命而士之助祭以爵弁緇裳故緇韠緇赤黃之間色也左氏傳衮冕黻珽疏曰黻韠制同而名異鄭元詩箋云芾太古黻膝

之象也冕服謂之芾其他服謂之韠

右韠

天子素帶朱裏終辟

謂大帶也

而素帶終辟大夫素帶辟垂

士練帶率下辟

辟依注爲裨婢支反率音律辟謂諸侯也諸侯不朱裏合素爲之下天

而素帶終

子也大亦如之率絳也士以下皆裨不合而絳積如今作幪頭爲之也辟讀如裨冕之裨冕之裨謂以繪采飾其側人君充之大夫裨其紐及末士裨其末而已幪七曹反疏曰天子素帶朱裏者以素爲帶用朱爲裏終辟辟而裨也終竟帶身在要及垂皆裨故云終辟諸侯以素爲帶不以朱爲裏亦用朱綠終辟大夫亦素爲帶不終裨但以元華裨其身之兩旁及屈垂者士練帶率下辟者士用熟帛練爲帶其帶用單帛兩邊絳而

已絳謂緹緝也。下裨者，但士帶垂者必反屈，嚮上反并垂而下大夫則總皆裨之士，則用緇唯裨嚮下垂者并。

紐約用組三寸長，齊於帶，紳長制士三尺，有司二尺有

五寸。子游曰：三分帶下，紳居二馬，紳鞞結三齊。

三寸謂約帶紐

組之廣也。長齊於帶，與紳齊也。紳帶之垂者也。言其屈而重也。論語曰：子張書諸紳。有司，府史之屬也。三分帶下而長三尺，則帶高於紳也。結約餘也。疏曰：記者引子游之言以證紳之長短。人長八尺，大帶之下四尺五分，分爲三分，紳居二馬，紳長三尺也。革帶博二寸。玉藻革帶博二寸其說見上文鞞制

大夫大帶四寸，雜帶。君朱綠，大夫元華，士緇，辟二寸，再

繚四寸。凡帶有率，無箴功。

雜猶飾也。卽上裨也。君裨帶上以朱，下以綠，終之大夫裨。

垂外以元內以革革黃色也士裨垂之下外內皆以緇是爲緇帶大夫以上以素皆廣四寸士以練廣二寸再繅之凡帶有司之帶也亦繅之如士帶矣無箴功則不裨之士雖繅帶裨亦用箴功楊氏曰禮士練帶率下辟士冠主人朝服緇帶冠者爵皮弁緇布冠皆緇帶則士帶皆練而皆飾以緇也

陳氏禮書曰古者革帶大帶皆謂之鞶內則所謂

男鞶革帶也春秋傳所謂鞶厲大帶也易言鞶帶

揚子言鞶悅以至許慎服虔杜預之徒皆以鞶爲

帶特鄭氏以男鞶革爲盛悅之囊誤也詩言垂帶

而厲毛萇杜預之徒皆以厲爲帶之垂者特鄭氏

以而厲爲如裂亦誤也辟猶冠裳之辟積也率縫合之也天子諸侯大帶終辟則竟帶之身辟之大夫辟其垂士辟其下而已雜飾也飾帶君朱綠大夫元華士緇故儀禮士冠主人朝服緇帶冠者爵弁皮弁緇布冠皆緇帶則士帶練而飾以緇也士辟下二寸則所辟其下端二寸也再繚四寸則結處再繚屈之四寸也天子至士帶皆合帛爲之或以素或以練或終辟或辟垂或辟下其飾或朱綠

或元華蓋素得於自然練成於人功終辟則所積者備辟垂辟下則所積者少朱者正陽之色綠者

少陽之雜

禮器冕朱綠藻雜記公襲朱綠帶聘禮問諸侯朱綠纁皆取陽色

元與

緇者陰之體華者文之成天子體陽而兼乎下故朱裏而裨以朱綠諸侯雖體陽而不兼乎上故飾以朱綠而不朱裏大夫體陰而有文故飾以元華士則體陰而已故飾以緇然於大夫言帶廣四寸則其上可知而士不必四寸也於士言紳三尺則

其上可知而有司止於二尺五寸也凡帶有率無
歲功則帶緯而已無刺繡之功也以至并紐約紐
三寸再繚四寸紳鞞結三齊皆天子至士所同也
夫所束長於飾則失之太拘所飾長於束則失之
太文紳鞞結三齊

叔向曰衣有
會帶有結

然後爲稱則有司

之約鞞蓋亦二尺五寸歟古者於物言華則五色

備矣

書云華
蟲華玉

於文稱凡則衆禮該矣鄭氏以華爲

黃以凡帶爲有司之帶以率爲士與有司之帶以

辟爲裨以二寸爲士帶廣以至大夫以上用合帛
士以下裨而不合皆非經據之論也

又曰內則曰男鞶革莊子曰帶死牛之脅王藻曰
革帶博二寸士喪禮韜帶用革笏插於帶之右旁
然則革帶其博二寸其用以繫佩韜然後加以大
帶而佩繫於革帶笏插於二帶之間矣晉語寺人
勃鞞曰乾時之役申孫之矢集於桓鉤鉤近於祛
而無怨言則革帶有鉤以拘之後世謂之鉤髀

列丑

切
阮諶云鰐螳螂相以相拘帶謂之鉤鰐唐以玉
爲鉤鰐與古異矣然革帶用於古而已荀卿曰緡
紳而無鉤帶是也古者裼衣象裘色韠屨象裳色
而革帶與韠其用相因則革帶豈亦與韠同色歟
右帶

天子佩白玉而元組綬公侯佩山元玉而朱組綬大夫
佩水蒼玉而純組綬世子佩瑜玉而綦組綬士佩璫玼
而緡組綬

玉有山元水蒼者視其文色所以也綬者所以賁佩玉相承受者也純當爲緡古文緡字

或作絲旁才綦文雜色也緼赤黃純讀爲緼佩其反
瑜羊朱反綦音其璫而充反玨武巾反字又作玨同緼

音溫疏曰玉色似山之元而雜有文似水之蒼而雜

有文故云文色所以但尊者玉色純公侯以下玉色漸

雜而世子及士唯論玉質不明玉色則玉色不定也瑜

是玉之美者故世子佩之璫玨石次玉賤故士佩之

一命緼韞幽衡再命赤韞幽衡三命赤韞葱衡

緼韞注見上韞

條衡佩玉之衡也幽讀爲黝黑謂之黝青謂之葱

韞昭曰衡似磬而小孔賴達曰佩玉上繫於衡下垂三

道穿以璫珠前後下端垂以璫中央下端垂以衡牙

後佩之衿也鄭氏謂凡佩繫於革帶則繫於革帶者後

也璫璫居前後而牙衡之璧半璧謂之璫大戴記曰下有雙

璫璫居前後而牙衡之然後有宮角徵羽之音衡牙

玉藻曰佩玉有衡牙鄭氏謂居中央以爲前後觸璫

璫說文曰璫佩玉名璫玨石似玉也大戴記曰上有雙

衡下有雙璜衡牙螾珠以納其間琚瑀以雜之注曰玼珠納於衡璜之間玼亦作螾總曰玼珠而赤者曰琚白者曰瑀左氏詩傳曰雜佩者琚瑀璜瑀衡牙之類則居中夾而璜瑀爲之也纂要曰琚瑀則在佩玉之中間禮記曰行步有環佩之聲又孔子佩象環衛南子環佩璆然魯昭公賜仲環而佩之漢制緹綬之間得施之玉環鐻蓋古者佩玉則有環

古之君子必佩玉

君子士以上

右徵角左宮羽

玉聲所中也徵角在右事

也民也可以勞宮羽在左君也物也宜逸

趨以采齊

路門外之樂節至應門謂之趨齊當作楚薺之

薺采薺詩名

行以肆夏

登堂之樂節

周還中規

反行也宜圜

折還中矩

曲行也

進則揖之退則揚之然後玉鐙鳴也

揖之謂小俛見於前

也揚之謂小仰見於後也鏘聲貌

故君子在車則聞鸞和之聲行則鳴

佩玉是以非辟之心無自入也

鸞在衡和在式自由也

君在不佩

玉左結佩右設佩

謂世子也出所處而君在馬則去德佩而設事佩辟德而示卽事也結其

左者若於事有未能也結者結其綬不使鳴焉

居則設佩

謂所處而君不在焉

朝則結佩

朝於君亦結左

齊則結佩而爵韞

結又屈之思神靈不在事也爵韞者齋服元

端齊側皆反注同綺側耕反

凡帶必有佩玉唯喪否

喪主於哀去飾謂天子以至於

士凡佩玉有衝牙

居中央以前後觸也

君子無故玉不去身君子於

玉比德焉

故謂喪與災責

陳氏禮書曰古之君子必佩玉其制上有折衡下有雙璜中有琚瑀下有衝牙貫之以組綬納之以璵珠而其色有白蒼赤之辨其聲有角徵宮羽之應其象有仁智禮樂忠信道德之備

見禮記君子比德於玉

此所以非僻之心無自入也

又曰禮紳緹結三齊特佩綬之長無所經見漢制貴者綬長三尺二寸卑者綬長三尺古者之佩蓋

亦類此

漢制曰綬者佩綬也謂之綬以其貫玉相迎也

右佩

笏天子以球玉諸侯以象大夫以魚須文竹士竹本象

可也

球美玉也文猶飾也大夫士飾竹以爲笏不敢與君並用純物也正義曰大夫以魚須文竹者文

飾也以鮫魚須飾竹而成文士以竹爲本質以象牙飾其邊緣飾之可也言可者通許之辭見於天

子與射無說笏入太廟說笏非禮也

言凡吉事無所說笏也太廟之中唯

君當事說笏也

小功不說笏當事免則說之

免悲哀哭痛之時不在於記事也小

功輕不當事可以搢笏也

既搢必盟雖有執於朝弗有盟矣

搢笏輒盟爲必

執事凡有指畫於君前用笏造受命於君前則書於笏笏

畢用也因飾焉

畢盡也疏曰謂事事盡用笏記之因

笏

度二尺有六寸其中博三寸其殺六分而去一

殺猶杼也天子

杼上終葵首大夫士又杼其下首廣二寸半正義曰天子杼上此云殺故知殺猶杼也云諸侯不終葵首者以玉人云天子終葵首故知諸侯不也葵首椎頭也云大夫士又杼其下者以經特明云其中博三寸明笏上下二首不博三寸諸侯既南面之君同殺其上大夫士北面之臣宜俱殺其下也

天子搢珽方正於天下也

此亦笏也謂之珽然無所屈也或謂之大圭長三尺杼

上終葵首終葵首者於杼上廣其首方如椎頭是謂無所屈後則恒直相玉書曰珽玉六寸明自炤諸侯

荼前詘後直讓於天子也

荼讀爲舒遲之舒舒懦者所畏在前也詘謂圜殺其首不

爲推頭諸侯唯天子大夫前詘後詘無所不讓也大夫奉君

命出入者也上有天子下將適公所史進象笏書思對

命思所思念將以告君也對所以對君者也年不順成

君衣布搢本搢本去珽茶佩士笏也

荀卿曰天子御珽諸侯御茶大夫服笏

管子曰天子執玉笏以朝日釋名曰笏忽也君有命

則書其上備忽忘也

陳氏禮書曰天下之事常修治於人之所慎而廢

弛於人之所忽先王於是制之爲笏或執或搢而
畢用之使人稽其名以見其義觀其制以思其德
庸有臨事而失者乎天子之笏以玉諸侯以象大
夫以魚須文竹士竹本象可也蓋玉德之美象義
之辨竹禮之節天子尚德諸侯貴義大夫士則循
禮而已此笏所以異也魚須文之也竹本象可也
竹本而象飾之也大夫近尊而其勢屈士遠尊而
其禮伸此飾所以異也禮大夫沐稷而君與士皆

沐梁大夫之臣曰私人而君與士之臣皆曰私臣
大夫祭則堂之上下共尊而君與士則堂下異尊
大夫內子拜尸西而君與士之妻則北面大夫之
於主婦不致爵而君與士則致爵大夫嗣子不舉
奠而君與士之嗣則舉奠大夫賓尸尸酢主人乃
設席而君與士則先酢而設席大夫前祭一日筮
尸而君與士則前祭三日筮尸大夫祭之日視濯
而君與士則前祭一日視濯凡此皆順而撫之之

禮則其飾笏以象不亦可乎天子之於天下體無所屈故珽必方正諸侯之於天子則謹度以臣之於臣民則制節以君之故荼必前屈後直大夫於其君則爲臣於天子則爲陪臣故笏必前屈後屈士笏之制無所經見觀其制之以象疑亦前屈後直歟天子之朝日執鎮圭搢大圭則所執者摯也所搢者笏也諸侯之朝大夫之聘蓋亦如此則諸侯執命圭者必搢荼大夫執聘圭者必搢笏及其

合瑞而授圭則執其所搢而已此所謂見於天子
無說笏也見天子也入太廟也射也皆禮之不可
忽者故不說笏小功則禮可以勝情故亦不說笏
當事而免則事可以勝禮故說之小功不說笏則
大功以上說之可知

朱子語錄曰今官員執笏最無義理笏者只在君
前記事恐事多須以紙粘笏上記其頭緒或在君
前不可以手指人物便用笏指之此笏常只插在

腰間不執在手中夫子攝齊升堂何曾手中有笏
攝者是畏謹恐上階時踏着裳有顛仆之患執圭
者自是贅見之物只是捧至君前不是如執笏所
以夫子執圭時便足縮縮如有循緣手中有圭不
得攝齊亦防顛仆

按圭鎮寶也笏服飾也圭則執之以爲信笏則執
之以爲飾晦庵言笏只是君前記事指畫之具不
當執之於手然古者天子亦有笏豈亦藉此以記

事指畫乎蓋朝章之服飾也但天子之笏以玉爲之其制似圭而天子與公侯伯之圭上銳下方其形類笏故後人或誤以圭爲笏然笏者非執則搢不可須臾去身者也若圭則天子以禮神諸侯以朝見天子不過於當事之時暫捧之而卽奠之不常執也嘗見繪禮圖者繪上公衮冕執桓圭在手如秉笏之狀是矣至卿大夫無圭璧則端冕盛服而執所謂羔鴈者在手殊爲可笑蓋誤以圭爲笏

誤以鎮信之具爲服飾之具故也

所謂公執桓圭至士執雉者特

言贄之等級耳此執字非必謂兩手捧之當心如執笏之狀也又如大司馬振旅之時王執路鼓諸侯執賁鼓此二鼓乃鼓中之至大者師之耳目係焉故王之與諸侯自司其事而謂之執豈亦以是二鼓者執之於手而如執圭之狀乎

右笏

屨人掌王及后之服屨爲赤舄黑舄赤纁黃纁青句素

屨葛屨

屨必連服言者著服各有屨也複下曰舄禪下曰屨古人言屨以通於複今世言屨以通於禪

俗易語反舄屨有絢有纁有純者飾也鄭司農云赤纁黃纁以赤黃之絲爲下緣士喪禮曰夏葛屨冬皮屨皆

纁纁純禮家說纁亦謂以采絲縹其下元謂凡烏屨各象其裳之色士冠禮曰元端黑屨赤紵纁純素積白屨緇纁纁純爵弁纁屨黑紵纁純是也王吉服有九烏有三等赤烏爲上冕服之烏也詩云王錫韓侯元衮赤烏則諸侯與王同下有白烏黑烏句當爲紵聲之誤也紵纁純同色今云赤纁黃纁青紵雜互言之明烏屨衆多反覆以見之凡烏之飾如纁之次赤纁者王黑烏之飾青紵者王白烏之飾言纁必有紵純言紵亦有纁純三者相將王及后之赤烏皆黑飾凡屨之烏如綉次也黃屨白飾白屨黑飾黑屨青飾紵謂之拘著烏屨之頭以爲行戒纁縫中紵純緣也天子諸侯吉事皆烏其餘唯服冕衣翟者著烏耳士爵弁纁屨黑紵纁純尊祭服之屨飾也纁也素屨者非純吉有凶去飾者言葛屨明有用皮時正義下謂底也重底者名曰烏禪底者名曰屨古人周人也言屨以通於烏故直言屨下言烏今人漢人也以複者爲屨并禪者亦爲屨俗易語反也纁牙

底相接之縫綴條於其中綰屨頭以條爲鼻純以條爲口緣經不云純者文畧也烏屨與裳俱在下故與裳同色素屨即下經散屨大祥時除縗杖後身服素縞麻衣而著此素屨去飾無纁約純故經不言纁約純也葛屨自赤烏以下夏則用葛爲之冬則皮爲之在素屨下者欲見素屨亦用葛與皮赤烏者男子冕服婦人闕狄之烏黑烏者天子諸侯元端服之烏赤纁以下曰纁曰約以表見其烏赤纁者是天子諸侯黑烏之飾黃纁者與婦人爲元烏之飾青約者與王及諸侯爲白烏之飾辨凡屨烏皆有約纁純三者相將各舉其一以互見也

外內命夫命婦之命屨功屨散屨

命夫之命屨纁屨命婦之命屨黃屨以下

功屨次命屨於孤卿大夫則白屨黑屨九嬪內子亦然世婦命婦以黑屨爲功屨女御士妻命屨而已士及士妻謂再命受服者散屨亦謂去飾正義曰大夫以上衣冠則有命烏無命屨外命婦孤妻以下內命九嬪以

下不得服烏自鞠衣黃屨展衣
白屨祿衣黑屨以下以廣之矣

陳氏禮書曰詩云赤舄几几元袞赤舄赤芾金舄

周公及諸侯冕服之舄也赤舄謂之金舄者鄭氏

謂金舄黃朱色也考之於禮周尚赤而灌尊黃彝

纁裳赤黃馬黃朱而諸侯之芾亦黃朱

鄭氏釋斯
干詩曰芾

天子純朱
諸侯黃朱則舄用黃朱宜矣唐制以金飾屨與鄭

氏之所傳異也

楊氏曰愚按屨人言王后之舄屨惟有赤舄黑舄

素屨葛屨其爲飾不過赤纁黃纁青紵而已鄭氏
則以爲王之爲有三赤黑白后之爲有三元白黑
又有黃屨白屨黑屨之異外內命夫命婦之命屨
惟有功屨散屨而已鄭氏又有纁黃白黑之屨皆
是經外推說恐難據信

右屨

文獻通考卷第一百十一

欽定四庫全書

史部

文獻通考卷一百十二

詳校官編修_臣李堯棟

編修_臣程嘉謨覆勘

覆校官庶吉士_臣陳墉

校對官中書_臣高中

謄錄監生_臣王鉞

欽定四庫全書

文獻通考卷一百十二

鄱陽馬端臨貴與著

王禮考七

君臣冠冕服章

秦滅禮學郊社服用皆以初元以從冕旒前後遽延

蔡邕

獨斷曰初繒也以水德尚初音均

漢承秦敝西京二百餘年猶未能有所制立

漢舊儀凡齋皆衣元紺繒也衣絳領褱緣綉纁革帶鴻紺幘長冠紺青衣幘領褱綉纁白帶求兩皐緣衣緇婁霜幘衣冬射獵衣流黃仲夏衣黃

西漢史不言朝祭服章之制惟漢舊儀所載如此然其說終不明白云

文帝時賈誼上疏曰今民賣僮者

僮謂隸妾

為之繡衣絲

履偏諸緣

服虔曰如牙條以作履緣師古曰偏諸若今之織成以為要襪及褌領者也古謂之

車馬裙其上為乘車及騎從之象也

內之閑中

閑賣奴婢門

是古天子后服

所以廟而不宴者也

入廟則服之宴處則不著蓋貴之也

而庶人得以

女婢妾白縠之表薄紵之裏紵以偏諸

晉灼曰以偏諸紵著衣也

師古曰紵音妾謂以偏諸縠著之也縠音步千反

美者黼黻

黼者織為斧形黻者刺為衆文

是故天子之服今富人大賈嘉會召客者以被墻古

者以奉一帝一后而節適

得其節而合宜

今庶人屋壁得為

帝服倡優下賤得為后飾然而天下不屈者殆未有

也且帝之身自衣皂綈

綈厚縐也

而富民墻屋被文繡天

子之后以緣其領庶人嬖妾緣其履此臣所謂舛也

宣帝時魏相采易陰陽及明堂月令奏曰天子之義

必純取法天地而觀於先聖高皇帝所述書天子所

服第八

第八天子衣服之制於施行詔第八

曰大謁者臣章受詔長樂

宮曰令羣臣議天子所服以安治天下相國臣何御

史大夫臣昌

蕭何周昌

謹與將軍臣陵

王陵

太子太傅臣通

叔孫通

等議春夏秋冬天子所服當法天地之數中得

人和故自天子王侯有土之君下及兆民能法天地

順四時以治國家身亡禍殃年壽永究是奉宗廟安

天下之大禮也臣請法之中謁者趙堯舉春

應劭曰四時各

舉所施行政事服虔曰主一時衣服禮物朝祭百事也

李舜舉夏兒湯舉秋貢

禹舉冬

高帝時自有一貢禹

四人各職一時大謁者襄章奏制

曰可

按西漢服章之制於史無所考見班固叙傳言漢初定與民無禁師古注謂漢不設車旗衣服之禁今觀賈誼所言可見然魏相奏謂高皇帝書有天子所服第八則服制未嘗無其書相所奏既不詳

備而史記無傳焉蓋周之經制歷春秋戰國數百年典籍湮沒不存及七雄僭王國自為政尤無所究詰秦出自西戎不習禮文之事而其立意大槩欲是今而非古尊已而卑人故滅六國之後獲其君之冠則以賜侍人獲其君之車則以為副車又烏能參考損益以復先王車旗衣服之制漢初用事者椎朴少文不過盡遵秦規而已

後漢明帝永平二年春正月辛未宗祀光武皇帝於明

堂帝及公卿列侯始服冠冕衣裳玉佩紉履以從事

漢官儀曰天子冠通天諸侯王冠遠遊三公諸侯冠
進賢三梁卿大夫尚書二千石博士冠兩梁二千石
以下至小吏冠一梁天子公卿特進諸侯祀天地明
堂皆冠平冕天子十二旒三公九卿諸侯七其纓各
如其綬色

永平二年詔有司采周官禮記尚書皋陶篇天子冕
服從歐陽氏說乘輿備文日月十二章刺繡文三公九

卿特進侯朝侯侍祠侯從夏侯氏說三公諸侯用山龍
九章九卿以下用華蟲七章皆備五采大佩赤舄約履
以承大祭冕皆廣七寸長尺二寸前圓後方朱綠裏元
上前垂四寸後垂三寸繫白玉珠為十二旒

蔡邕獨斷云九旒也

以其綬采色為組纓三公諸侯七旒青玉為珠卿大夫
五旒黑玉為珠皆有前無後各以其綬采為組纓旁垂
黼纁郊天地祀明堂則冠之衣裳玉佩備章采其大佩
則衝牙雙瑀璜皆以白玉乘輿絡以白珠公卿諸侯以

采絲百官執事者冠長冠

即劉氏冠也以高祖所冠故以為祭服

皆祇服

五嶽四瀆山川宗廟社稷諸壇秩祠皆祔元服絳緣領

袖為中衣絳襪示其赤心奉神也其五郊迎氣衣幘袴

襪各如方色云百官不執事者各服長冠祔元以從大

射於辟雍公卿諸侯大夫行禮者冠委貌衣元端素裳

鄭元曰端者取其正也鄭衆曰衣襦裳為端

執事者冠布弁衣緇麻衣皐領

袖下素裳若冠通天冠服深衣之制有袍隨五時色

梁劉

照曰袍者或曰周公抱成王宴居故施袍孔子衣逢掖之衣逢掖其袖合而逢大似近今袍者也今下至賤吏

小史皆通制袍單衣卓緣領袖中衣為朝服云

凡冠衣諸服旒冕長冠委貌皮弁爵弁建華方山巧士衣裳文繡赤舄服約履大佩皆為祭服其餘悉為常用朝服唯長冠諸王國謁者以為常朝服云宗廟以下祠祀皆冠長冠皐繒袍單衣絳緣領袖中衣絳袴袜五郊各從其色焉

東觀記永平二年正月公卿議南北郊東平王蒼議曰高皇帝始受命創業制長冠以入宗廟光武受命

中興建明堂立辟雍陛下以聖明奉遵以禮服龍袞
祭五帝禮缺樂崩久無祭天地冕服之制接尊事神
潔齊盛服敬之至也日月星辰山龍華藻天王袞冕
十有二旒以則天數旂有龍章日月以備其文今祭
明堂宗廟圓以法天方以則地服以華文象其物宜
以降神肅雖備思博其類也天地之禮冕冠裳衣宜
如明堂之制蓋古者君臣佩玉尊卑有度上有韍
如韍
今蔽貴賤有殊佩所以章德服之衷也韍所以執事

禮之共也故禮有其度威儀之制三代同之五伯迭

興戰兵不息佩非戰器鞞非兵旗於是解去紱佩留

其繫璲

徐廣曰今名璲為繼

以章表之故詩曰鞞鞞佩璲此之

謂也

鞞鞞佩玉貌璲瑞也鄭元箋曰佩璲者以瑞玉為佩佩之鞞鞞然

紱佩既廢秦

乃以采組連結於璲光明章表轉相結受故謂之綬

漢承秦制用而弗改故加之以雙印佩刀之飾至孝

明皇帝乃為大佩衝牙雙璫璜皆以白玉乘輿絡以

白珠公卿諸侯以采絲其視冕旒為祭服云

魏氏多因漢法其所損益之制無聞

通典按後漢志孝明皇帝永平二年詔從歐陽夏侯二家所說制冕服乘輿刺繡文公卿以下織成文據晉志云魏明帝以公卿袞黼之飾擬於至尊多所減損始制服刺繡公卿織成未詳孰是

晉受命遵而無改天子郊祀天地明堂宗廟元會臨軒介幘通天冠平冕冕皐表朱綠裏廣七寸長二尺二寸加於通天冠上前圓後方垂白玉珠十有二旒以朱組

為纓無綫佩白玉華珠黃大旒綬黃赤紺纁

上數沿反
下右暗反

四采衣皐上絳下前三幅後四幅衣畫而裳繡為日月

星辰山龍華蟲藻火粉米黼黻之象凡十二章素帶廣

四寸朱裏以朱緣裨

音卑服
寗也

飾其側中衣以絳緣其領

袖赤皮為韍絳袴袂

望發
反

赤舄未加元服者空頂介幘

其釋奠先聖則皐紗袍絳緣中衣絳袴袂黑舄其臨軒

亦袞冕也其朝服通天冠高九寸金博山顏黑介幘絳

紗袍皐緣中衣其拜陵黑介幘單衣其雜服有青赤黃

白紵黑色介幘五色絳袍五梁進賢冠遠遊冠平上幘

武冠其素服白帟

苦洽反

單衣後漢以來天子之冕前後

旒用真白玉珠魏明帝好婦人之飾改以珊瑚珠晉初
仍舊不改及過江服章多闕而冕飾以翡翠珊瑚雜珠
侍中顧和奏舊禮冕十二旒用白玉珠今美玉難得不
能備可用白璇

音旋

珠從之

革帶古之鞶帶也謂之鞶革文武衆官牧守丞令下及
騶寺皆服之其有囊綬則以綴於革帶其戎服則以皮

絡帶代之八座尚書荷紫以生紫為袷

古洽字

囊綴之服

外加於左肩昔周公負成王制此服衣至今以為朝服

或云漢時用盛

音成

奏事負之以行未詳也袴褶之制未

詳所起近世凡車駕親戎中外戒嚴服之服無定色冠

黑帽綴紫標標以繒為之長四寸廣一寸腰有絡帶以

代鞶中官紫標外官絳標又有纂嚴戎服而不綴標行

留文武悉同其畋獵巡幸則惟從官戎服帶鞶革文官

不下纓武官服冠漢制一歲五郊天子與執事者所服

各如方色百官不執事者服常服絳衣以從魏祕書監
秦靜曰漢氏承秦改六冕之制但元冠絳衣而已魏已
來名為五時朝服又有四時朝服自皇太子已下隨官
受給百官雖服五時朝服據今止給四時朝服闕秋服
三年一易諸假印綬而官不給鞶囊者得自具作其但
假印不假綬者不得佩綬鞶古制也漢世著鞶囊者側
在腰間或謂之傍囊或謂之綬囊然則以紫囊盛綬也
或盛或散各有其時

笏古者貴賤皆執笏其有事則搢之於腰帶所謂搢紳之士者搢笏而垂紳帶也紳垂長三尺笏者有事則書之故常簪筆今之白筆是其遺象三臺五省二品文武簪之王公侯伯子男卿尹及武官不簪加內侍位者乃簪之手版即古笏矣尚書令僕射尚書手版頭復有白筆以紫皮囊之名曰笏宋因之

宋制平天冠服不易舊法更名靴曰蔽膝未加元服釋奠先聖視朝拜陵等服及雜色紗裙武冠素服並沿舊

王公助祭郊廟章服降殺亦如之冠委貌者衣黑而裳素中衣以皐領袖元冠韋弁絳韋戎衣復依漢法袴褶因晉不易腰有絡帶以代鞶革中官紫標外官絳標又有纂嚴戎服而不綴標行留文武悉同畋獵巡幸唯從官戎服帶鞶革元嘉中巡幸蒐狩救廟水火皆如之

明帝泰始四年詔曰車服之飾象數是遵故盛皇留範列聖垂制服近改定今修成六服沿時變禮所施之事各有條叙便可載之典章朕以大冕純玉纁元衣黃裳

祀天宗明堂又以法冕元衣絳裳祀太廟元正大會朝諸侯又以飾冕紫衣紅裳小會宴亭送諸侯臨軒會王公又以繡冕朱衣裳征伐講武校獵又以絃冕青衣裳耕稼享國子又以通天冠朱紗袍為聽政之服泰始六年正月有司奏被勅皇太子正冬朝賀合著袞冕九章下儀曹郎邱仲起議按周禮公自袞冕以下鄭注袞冕以至卿大夫之元冕皆其朝聘天子之服也伏尋古之上公尚得服之皇太子以倖副之尊率土瞻仰愚謂宜

式遵盛典服袞九章以朝賀詔可

齊因宋制平天冠服不易舊法郊廟臨朝所服也舊袞服用織成建武中明帝以織太重乃采畫為之如金飾銀薄時亦謂為天衣通天冠服絳紗袍皁緣中衣乘輿臨朝所服臣下皆同拜陵則黑介幘服無定色舉哀臨喪白袷單衣亦謂之素服王公助祭平冕服山龍以下九章卿七章皆畫皁絳繒為之袴褶相因不改

梁因齊制平天冠服衣畫而裳繡十二章素帶朱裏以

朱緣裨飾其側更名赤皮鞞為鞞

或云鞞之名其來已久

餘同舊

法又有通天冠服絳紗袍皐緣中衣黑是為朝服元正
賀畢還儲更衣出所服也其釋奠先聖則皐紗袍絳緣
中衣絳袴鞞黑舄拜陵則箋布單衣又有白袷單衣以
代古之疑纁

天監三年何佟之議公卿以祭服裏有中衣即今中單
也後漢從夏侯氏說祭服絳緣領袖為中絳袴鞞示其
赤心奉神也今中衣絳緣足有所明無俟於袴既非聖

法謂不可施遂依議除之

七年周舍議按禮有虞氏皇而祭深衣而養老鄭元云
皇是畫鳳皇羽也又按禮加袞冕則袞是衣有虞氏言
皇皇亦是衣非冕今袞服宜畫鳳皇以示差降又王僧
崇云尋冕服無鳳應改為翟又裳有圓花於禮無礙是
畫飾如葩蒔耳

蒔音于美反

藻米黼黻並乖古制今請改正

並去圓花帝曰古日月星辰此以一辰攝三物也山龍
華蟲又以一山攝三物也藻火粉米又以一藻攝三物

也是為九章今衮服畫龍則宜畫鳳孔安國云華者花也則為花非疑若一向畫翟差降之文復將安寄帝又曰禮王祀昊天服大裘而冕大裘不存其於質敬恐未有盡五經博士陸瑋等並云王祀昊天服大裘明諸臣禮不得同自魏以來皆用衮服今請依古更制大裘詔可瑋等又按鄭元注司服云大裘羔裘也既無所出未為可據按六冕之服皆元上纁下今宜以繒為之其制式如裘其裳以纁皆無文繡詔可又制黑幘單衣宴會

服之九年司馬筠等議云按玉藻諸侯元冕以祭裨冕以朝雜記又云大夫冕而祭於公弁而祭於已今之尚書上異公侯下非卿士止有朝衣本無冕服既從齋祭不容同於在朝宜依太常及博士諸齋官例著白衣絳褙中單竹葉冠

陳因之永定元年武帝即位徐陵曰乘輿御服皆採梁制帝曰今天下初定務從節儉應用繡織成者並可彩畫至文帝天嘉初悉改易之其皇太子絳紗袍皐領白

紗中衣白帶大小會祠廟朔望五日還朝皆朝服常還上宮則朱服若釋奠及朝絳緣中單絳袴襪元烏侍祀袞衣九章白紗絳緣中單絳繒鞞赤烏絳鞵皇太子舊有五時朝服自梁天監之後則朱服諸王朝服朱衣絳紗袍皐緣中衣素帶黑烏若加餘官則服其加官之服開國公侯伯子男並朝服紗朱衣若助祭郊廟皆袞元上纁下山龍以下九章備五采大佩赤烏約履餘文官朝服武賁中郎將羽林監絳紗縠單衣州刺史絳朝服

直閣將軍諸殿主帥朱衣正直絳衫從則襴褕衫太子
衛率率更令丞阜朝服殿中將軍員外將軍州郡都尉
司馬中通事舍人太子通事等並朱服元衣赤幘袴褶
太子二傅所服武冠絳繡殿前威儀武賁散給使閣將
鼓吹士帥副太子鹵簿戟吏所服

後周設司服之官掌皇帝十二服祀昊天上帝則蒼衣
五方上帝各隨方色朝日用青衣祭皇地祇用黃衣夕
月用素衣神州社稷用元衣享先皇加元服納后朝諸

侯則十二章享諸先帝食三老五更耕籍等自龍以下
九章祀星辰視朝大射饗羣臣等八章羣祀臨太學入
道法門燕射養庶老適諸侯家七章其九章以下衣重
袞山驚裳重黼黻俱十有二等通以升龍為領標巡兵
即戎則黼章為衣裳田獵則皮弁白布衣而素裳也諸
公之服九章服之章數隨寃而降其一具八章以下衣
重藻粉米裳重黼黻俱九等皆以山為領標諸侯服八
章而下俱八等皆以華蟲為領標諸伯皆七章而下俱

七等以火為領標諸子服六章俱六等皆以宗彝為領標諸男服五章皆以藻為領標三公之服有九章有六衣重藻與粉米裳重黼黻俱為九等皆以宗彝為領標三孤之服有八章有五衣重藻與粉米裳重黼黻為八等公卿服有七章有四衣重粉米裳重黼黻為七等皆以粉米為領標大夫之服有六章有三衣重粉米裳重黼黻為六等中大夫之服有五章有三衣重粉米為五等下大夫服有四章有三衣重粉米為四等士則祀弁

爵弁元冠服皆元衣其裳上士以元中士以黃下士雜

裳

謂前元後黃

庶士元冠服其在官府吏之屬服緇衣裳武

帝初服常冠以皁紗全幅向後幘髮仍裁為四脚

致堂胡氏曰君子大復古重變古非泥於古也以
生人之具皆古之聖人因時制宜各有法象意義
不可以私智更改之也用步卒而車戰法亡開阡
陌而井地法亡建郡縣而封建法亡以日易月而
通喪之禮廢從事鞍馬而轡軾之儀絕習為便易

而冕黻不復用尚以盂案而簋席不復施大抵視
便利為安日趨於苟簡而聖王所作法象意義不
復可見有天下者以智力得之凡所施設是今而
非古如宣帝所謂漢家自有制度者豈不可歎之
甚哉以周家紗幘一事論之此後世巾幘朝冠之
所自始也古者賓祭喪燕戎事其冠皆各有所宜
紗幘既行諸冠由此漸廢紗而用漆更為兩帶上
結兩帶後垂蓋自李唐以來而已然矣此又四脚

之變也自是以後則又以大帶之垂者左右橫之
而其頂則起後平前方為六角若天子侍衛之近
者則又武其一脚翹其一脚稽之法象果何所則
求之意義果何所據然而行之數百年莫有以為
非也至於總而簪弁則屬之道家者流非道家之
得也乃自老莊而後為之徒者其服變革未盡猶
有古士服之餘製焉耳治天下者莫大於禮禮莫
明於服服莫重於冠必欲盡善其必考古而立制

夫亦何獨冠為然哉

宣帝既傳位於太子自稱天元皇帝所居稱天臺寔二十四旒車服旗鼓皆加於前王之數既自比上帝不欲羣臣同己常自帶綬及冠通天冠加金附蟬顧見侍臣弁上有金蟬及王公有綬者並令去之

隋高祖將改周制下詔曰朕初受天命赤雀來儀兼姬周已還於茲六代三正迴復五德相生總以言之並宜火色垂衣已降損益可知尚色雖殊常兼前代其郊丘

廟社可依袞冕之儀朝會衣裳宜盡用赤昔丹烏木運
姬有太白之旗黃星尚德曹乘黑首之馬在祀與戎其
尚恒異今之戎服皆可尚黃在外常所著者通用雜色
祭祀之服須合禮經宜集通儒詳議太子庶子攝太常
少卿裴正奏曰竊見後周制冕加為十二既與前禮數
乃不同而色應五行又非典故謹按三代之冠其名各
別六等之冕承用區分璫玉五采隨班異飾都無迎氣
變色之文唯月令者起於秦代乃有青玉赤玉白駱黑

衣與四時而色變全不言於弁冕五時冕色禮既無文
稽於正典難以經證且後魏以來制度咸闕天興之歲
草創繕修所造車服多參胡制故魏叔論之稱為違古
是也周氏因襲將為故事大象承統咸取用之輿輦衣
冠甚多迂怪今皇隋革命憲章前代其魏周輦輅不合
制者已勅有司盡令除廢然衣冠禮器尚且兼行乃有
立夏袞衣以赤為質迎秋平冕用白成形既越典章須
革其謬謹按續漢書禮儀志云立春之日京都皆著青

衣秋夏悉如其色逮於魏晉迎氣五郊行禮之人皆同
此制考尋故事唯幘從衣色今請冠及冕色並用元唯
應著幘者任依漢晉制曰可於是定令採用東齊之法
乘輿衮冕垂白珠十有二旒以組為纓色如其綬黼
充耳玉笋元衣纁裳衣山龍華蟲火宗彝五章裳藻粉
米黼黻四章衣重宗彝裳重黼黻為十二等衣襟領織
成升龍白紗內單黼領青襟襜裾革帶玉鈎鐔大帶素
帶朱裏紕其外上以朱下以綠鞞隨裳色龍火山三章

鹿盧玉具劔火珠鏢首白玉雙佩元組雙大綬六采元
黃赤白襍緣純元質長二丈四尺五百首廣一尺小雙
綬長二尺六寸色同大綬而首半之間施三玉環朱韞
赤舄舄加金飾祀園丘方澤感帝明堂五郊雩禘封禪
朝日夕月宗廟社稷籍田廟遣上將征還飲至加元服
納后正月受朝及臨軒拜王公則服之通天冠加金博
山附蟬十二首施珠翠黑介幘玉簪導絳紗袍深衣製
白紗內單皐領襍褱絳紗蔽膝白假帶方心曲領其

革帶劔佩綬烏與上同若未加元服則雙童髻空頂黑
介幘雙玉導加寶飾朔日受朝元會及冬會諸祭還則
服之武弁金附蟬平巾幘餘服具服講武出征四時蒐狩大
射禡類宜社賞祖罰社纂嚴則服之黑介幘白紗單衣
烏皮履拜陵則服之白紗帽白練裙襦烏皮履視朝聽
訟及宴見賓客皆服之白帔白紗單衣烏皮履舉哀則
服之

程氏演繁露曰隋志宋齊之間天子宴私著白高

帽士庶以烏太子在上省則帽以烏紗在永福省則白紗隋時以白帽通為慶弔之服國子生亦服白紗巾也晉著白接羅竇苹酒譜曰接羅巾也南齊垣崇祖守壽春著白紗帽肩輿上城今人必以為怪古未有以白色為忌也郭林宗遇雨墊巾李賢注云周還輿服雜事曰巾以葛為之形如帽苦治反本居士野人所服魏武造帽其巾乃廢今國子學生服馬以白紗為之是其制皆不忌白也樂府

白紵歌曰質如輕雲色如銀制以為袍餘作巾袍
以先驅巾拂塵吳兢樂府要解按舊史白紵吳地
所出則誠今之白紵列子所謂阿錫而西子之舞
所謂白紵紛紛鶴翎亂者是也今世人麗粧必不
肯以白紵為衣古今之變不同如此唐六典天子
服有白紗帽其下服如裙襦襪皆以白視朝聽訟
燕見賓客皆以進御則猶存古制也然其下注云
亦用烏紗則知古制雖存未必肯用多以烏紗代

之則習見忌白久矣世傳明皇幸蜀圖山谷間老
叟出望駕有著白巾者釋者曰服諸葛武侯也此
不知古人忌白也

皇太子衮服元衣纁裳衣山龍華蟲火宗彝五章裳藻
粉米黼黻四章織成為之白紗內單黼領青褾襪裾革
帶金鈎鑠大帶素帶不朱裏亦紕以朱綠鞞隨裳色火
山二章玉具釵火珠鏤首瑜玉雙佩朱組雙大綬四綵
赤白縹紺純朱質長丈八尺三百二十首廣九寸小雙

綬長二尺六寸色同大綬而首半之間施二玉環朱襪
赤舄以金飾侍從皇帝祭祀及謁廟加元服納妃則服
之遠遊冠服絳紗袍白紗內單阜領襍襪裙白假帶方
心曲領絳紗蔽膝鞮舄其革帶劔佩綬與上同謁廟還
宮元日朔日入廟釋奠則服之遠遊冠公服絳紗單衣
革帶金鈎鐙假帶方心紛長六尺四寸廣二寸四分色
同其綬金縷鞶囊鞮履五日常朝則服之袞冕服九章
同皇太子王公開國公初受冊執贄入朝祭祀親迎則

服之三公助祭者亦服之鷩冕服七章衣華蟲火宗彝
三章裳藻粉米黼黻四章侯伯初受冊執贄入朝祭祀
親迎則服之毳冕服五章衣宗彝藻粉米三章裳黼黻
二章子男初受冊執贄入朝祭祀親迎服之絺冕服三
章正三品以下從五品以上助祭則服之自王公以下
服章皆繡為之祭服冕皆簪導青纁充耳元衣纁裳白

紗內單黼領

絺冕以下
內單青領

青標襪裾革帶鈎鐔大帶

王三
公及

公侯伯子男素帶不朱裏皆純其外上以朱下以綠正
三品以下從五品以上素帶純其垂外以元內以黃約

皆用青紐朱韍凡韍皆隨裳色衮鷩毳火山二章絺山一章

劍珮綬韍赤烏爵弁

服從九品以上助祭則服之其制服元衣纁裳無章白

絹內單青領襍襪裾革帶大帶

練帶純具垂內外以緇紐約用青紐

爵韍

韍赤履白恰白紗單衣烏皮履上下通服之委貌冠未

冠則雙童髻空頂黑介幘皆深衣青領烏皮履上下通

服四門生服之朝服

亦名具服

絳紗單衣白紗內單皂領袖

皐襪革帶鈎鑾假帶曲領方心絳紗蔽膝韍烏綬劍珮

從五品以上陪祭朝饗拜表凡大事則服之六品以下

從七品以上去劔珮綬餘並同自餘公事皆從公服

亦名

從省服

絳紗單衣革帶鈎觿假帶方心鞢履紛鞞囊從五

品以上陪祭朝饗拜表凡大事則服之六品以下從七

品以上去劔珮綬餘並同自餘公事皆從公服

亦名從省服

絳紗單衣革帶鈎觿假帶方心鞢履紛鞞囊從五品以

上服之絳禱衣公服

禱衣即單衣不垂胡者也袖狹形直如禱內餘同從省

流外

五品以下九品以上服之左右衛左右武衛左右武候

大將軍領左右大將軍並武弁絳朝服劔珮綬侍從則

平巾幘紫衫大口袴褶左右衛左右武衛左右武候將軍領左右將軍左右監門衛將軍太子左右衛左右宗衛左右內率等左右監門郎將及諸副率並武弁絳朝服劔珮綬侍從則平巾幘紫衫大口袴直閣將軍直寢直齋太子直閣武弁絳朝服劔珮綬侍從則平巾幘絳衫大口袴

隋文始服黃百官常服同於庶人皆著黃袍帝朝服亦如之惟以十三環為異也

致堂胡氏曰服章之設所以辨上下定民志也莫卑乎民莫尊乎天子而服同一色上下無所辨民

志何由定僭亂由此而生矣古之聖王自奉儉約
惡衣菲食而事天地宗廟臨朝廷百官則等級分
明故冕十有二章黻珽幅舄衡紃紼以昭其度
藻率鞞鞞鴈游纓以昭其數威嚴尊重禮無與
二然後人主之勢隆非廣己以造大理當然也故
晏平仲為大國之卿一狐裘三十年澣衣濯冠以
朝君子譏其隘曰難乎其為下也隋文儉約施之
宮闈之中燕私之用可也與庶人同服而坐乎廟

朝儉不中禮不足以為法矣

珽天子之笏長尺二寸方而不折以球玉為之笏度二尺有六寸中博二寸其殺六分去一晉宋以來謂之手版此乃不經今還謂之笏以法古名自西魏以降五品以上通用象牙六品以下兼用竹木

煬帝時師旅務殷車駕多行幸百官行從唯服袴褶而軍旅間不便至大業六年後詔從駕涉遠者文武官等皆戎衣貴賤異等襯用五色五品以上通著紫袍六品

以下兼用緋綠吏胥以青庶人以白屠商以皂士卒以黃

唐制天子之服十四大裘冕者祀天地之服也廣八寸長一尺二寸以板為之黑裘纁裏無旒金飾玉簪導組帶為纓色如其綬黼纁充耳大裘繒表黑羔裘為緣纁裏黑領標襟緣朱裳白紗中單皂領青標襪裾朱韞赤舄鹿盧玉具劒火珠鏢首白玉雙佩黑組大雙綬黑質黑黃赤白縹綠為純以備天地四方之色廣一尺長二

大四尺五百首紒廣二寸四分長六尺四寸色如綬又
有小雙綬長二尺六寸色如大綬而首半之間施三玉
環革帶以白皮為之以屬珮綬印章鞶囊亦曰革帶博
三寸半加金鏤玉鉤鑠大帶以素為之以朱為裏在腰
及垂皆有裨上以朱錦貴正色也下以綠錦賤間色也
博四寸紐約貴賤皆用青組博三寸黻以繒為之隨裳
色上廣一尺以象天數下廣二尺以象地數長三尺朱
質畫龍火山三章以象三才其頸五寸兩角有肩廣二

寸以屬革帶朝服謂之鞞冕服謂之黻袞冕者踐阼享廟征還遣將飲至加元服納后元日受朝賀臨軒冊拜王公之服也廣一尺二寸長二尺四寸金飾玉簪導垂白珠十二旒采絲組帶為纓色如綬深青衣纁裳十二章日月星辰山龍華蟲火宗彝八章在衣藻粉米黼黻四章在裳衣畫裳繡以象天地之色也自山龍以下每章一行為等每行十二衣標領畫以升龍白紗中單黻領青標襪裾黼繡龍山火三章烏加金飾黻冕者有事

遠主之服也八旒七章華蟲火宗彝三章在衣藻粉米黼黻在裳毳冕者祭海岳之服也七旒五章宗彝藻粉米在衣黼黻在裳絺冕者祭社稷饗先農之服也六旒三章絺粉米在衣黼黻在裳元冕者禘祭百神朝日夕月之服也五旒裳刺黼二章自袞冕以下其制一也簪導劒珮綬皆同通天冠者冬至受朝賀祭還燕羣臣養老之服也二十四梁附蟬十二首施朱翠金博山黑介幘組纓翠綏玉犀簪導絳紗袍朱裏紅羅裳白紗中單

朱領襹褊裾白裙襦絳紗蔽膝白羅方心曲領白鞵黑
舄白假帶其制垂二條帛以變祭服之大帶天子未加
元服以空頂黑介幘雙童髻雙玉導加寶飾三品以上
亦加寶飾五品以上雙玉導金飾六品以下無飾緇布
冠者始冠之服也天子五梁三品以上三梁五品以上
二梁九品以上一梁武弁者講武出征蒐狩大射禡類
宜社賞祖罰社纂嚴之服也有金附蟬平巾幘弁服者
朔日受朝之服也以鹿皮為之有攀以持髮十有二璫

玉簪導絳紗衣素裳白玉雙珮革帶之後有鞞囊以盛
小雙綬白鞵烏皮履黑介幘者拜陵之服也無飾白紗
單衣白裙襦革素鞵烏皮履白紗帽者視朝聽訟宴見
賓客之服也以烏紗為之白裙襦白鞵烏皮履平巾幘
者乘馬之服也金飾玉簪導冠支以玉紫褶白袴玉具
裝珠寶鈿帶有鞞白帟者臨喪之服也白紗單衣烏皮
履皇太子之服六袞冕者從祀謁廟加元服納妃之服
也白珠九旒紅絲組為纓犀簪導青纁充耳黑衣纁裳

凡九章龍山華蟲火宗彝在衣藻粉米黼黻在裳白紗
中單黼領青標襪裾革帶金鈎鐔大帶瑜玉雙珮朱組
雙大綬朱質赤白縹紺為純長一丈八尺廣九寸三百
二十首黻隨裳色有火山二章白鞵赤舄朱履加金塗
銀釳飾鹿盧玉具劔如天子遠遊冠者謁廟還宮元日
朔日入朝釋奠之服也以具服遠遊冠三梁加金博山
附蟬九首施朱翠黑介幘髮纓翠綳犀簪導絳袍紅裳
白紗中單黑領標襪裾白裙襦白假帶方心曲領絳紗

蔽膝白鞵赤舄朔日入朝通服袴褶公服者五日常朝
元日冬至受朝之服也遠遊冠絳紗單衣白裙襦革帶
金鈎鶻假帶瑜玉雙珮方心紛金縷鞶囊紛長六尺四
寸廣二寸四分色如大綬烏紗帽者視事及燕見賓客
之服也白裙襦烏皮履弁服者朔望視事之服也鹿皮
為之犀簪導組纓九璚絳紗衣素裳革帶鞶囊小綬雙
珮自具服以下皆白鞵烏皮履平巾幘者乘馬之服也
金飾犀簪導紫褶白袴起梁珠寶鈿帶鞵進德冠者亦

乘馬之服也九璆加金飾有袴褶常服則有白裙襦

羣臣之服二十有一袞冕者一品之服也九旒青璆為珠貫三采玉以組為纓色如其綬青纁充耳寶飾角簪導青衣纁裳九章龍山華蟲火宗彝在衣藻粉米黼黻在裳皆絳為繡遍衣白紗中單黼領青褾襪裾朱襪赤舄革帶鉤鑠大帶黻隨裳色金寶玉飾劔鏐首山元玉珮綠綬綬綠質綠紫黃赤為純長一丈八尺廣九寸二百四十首郊祀太尉攝事亦服之驚冕者二品之服也

八旒青衣纁裳七章華蟲火宗彝在衣藻粉米黼黻在裳銀裝劔珮水蒼玉紫綬素質紫黃赤為純長一丈六尺廣八寸一百八十首革帶之後有金鏤鞶囊金飾劔水蒼玉珮朱韉赤舄毳冕者三品之服也七旒寶飾角簪導五章宗彝藻粉米在衣黼黻在裳鞆二章山火紫綬如二品金銀鏤鞶囊金飾劔水蒼玉珮朱韉赤舄絺冕者四品之服也六旒三章粉米在衣黼黻在裳中單青領鞆山一章銀鏤鞶囊自三品以下皆青綬青質青

白紅為純長一丈四尺廣七寸一百四十首金飾劔水
蒼玉佩朱韉赤舄元冕者五品之服也以羅為之五旒
衣韍無章裳刺黻一章角簪導青衣纁裳其服用紬大
帶及裨外黑內黃黑綬紺質青紺為純長一丈二尺廣
六寸一百二十首象笏上圓下方六品以竹木上挫下
方金飾劔水蒼玉佩朱韉赤舄三品以下私祭皆服之
平冕者郊廟武舞郎之服也黑衣絳裳革帶烏皮履爵
弁者六品以下九品以上從祭之服也以紬為之無旒

黑纓角簪導青衣纁裳白紗中單青領標襪裾革帶鉤
鐔大帶及裨內外皆緇爵韠白鞵赤履五品以上私祭
皆服之武弁者武官朝參殿庭武舞郎堂下鼓人鼓吹
按工之服也有平巾幘武舞緋絲布大褰白練襍襠膝
蛇起梁帶豹文大口袴烏皮鞵鼓人朱繡衣草帶烏皮
履鼓吹按工加白練襍襠弁服者文官九品公事之服
也以鹿皮為之通用烏紗牙簪導纓一品九璫二品八
璫三品七璫四品六璫五品五璫犀簪導背朱衣素裳

革帶鞶囊小綬雙佩白鞢烏皮履六品以下去鞶及鞶
囊綬佩六品七品綠衣八品九品青衣進賢冠者文武
朝參三老五更之服也黑介幘青綾紛長六尺四寸廣
四寸色如其綬三品以上三梁五品以上兩梁九品以
上及國官一梁六品以下私祭皆服之侍中中書令左
右散騎常侍有黃金璫附蟬貂尾侍左者左珥侍右者
右珥諸州大中正一梁絳紗公服殿庭文武郎黃紗袍
黑領襪白練襪襠白布大口袴革帶烏皮履遠遊冠者

親王之服也黑介幘三梁青綾金鈎髀大帶金寶飾劍玉鏢首纁朱綬朱質赤黃纁紺為純長一丈八尺廣九寸二百四十首黃金璫附蟬諸王則否法冠者御史大夫中丞御史之服也一名解鴈冠高山冠者內侍省內謁者親王司閤謁者之服也委貌冠者郊廟文舞郎之服也有黑絲布大襖白練領標絳布大口袴革帶烏皮履却非冠者亭長門僕之服也平巾幘者武官衛官公事之服也金飾五品以上兼用玉大口袴烏皮鞞白練

裙襦起梁帶陪大仗有衲襠螭蛇朝集從事州縣佐史
岳瀆祝史外州品子庶民任掌事者服之有緋褶大口
袴紫附構文武官騎馬服之則去衲襠螭蛇袴褶之制
五品以上細綾及羅為之六品以下小綾為之三品以
上紫五品以上緋七品以上綠九品以上碧衲襠之制
一當胸一當背短袖覆膊螭蛇之制以錦為表長八尺
中實以綿象蛇形起梁帶之制三品以上玉梁寶鈿五
品以上金梁寶鈿六品以下金飾隱起而已黑介幘國

官視品府佐謁府國子太學四門生俊士參見之服也
簪導白紗單衣青襟襍領革帶烏皮履朱冠者冠則空
頂黑介幘雙童髻去革帶書筭律學生州縣學生朝參
則服烏紗帽白裙襦青領朱冠者童子髻介幘者流外
官行署三品以上登歌工人之服也絳公服以縵緋為
之制如絳紗單衣方心曲領革帶鈎鑠假帶襪烏皮履
九品以上則絳襦衣制如絳公服而狹袖形直如溝不
垂緋褶大口袴紫附襦去方心曲領假帶登歌工人朱

連裳革帶烏皮履殿庭加白練襪襠平巾綠幘者尚食局主膳典膳局典食大官署食官署供膳奉解之服也青絲布袴褶羊車小吏五辨髻紫碧腰襖青耳屨漏刻生漏童總角髻皆青絲布袴褶具服者五品以上陪祭朝享拜表大事之服也亦曰朝服冠幘纓簪導絳紗單衣白紗中單黑領袖黑襖襪裾白裙襦革帶金鈎躡假帶曲領方心絳紗蔽膝白鞵烏皮舄劔紉鞞囊雙珮雙綬六品以下去劔佩綬七品以上以白筆代簪八品九

品去白筆白紗中單以履代舄從省服者五品以上公
事朔望朝謁見東宮之服也亦曰公服冠幘纓簪導絳
紗單衣白裙襦革帶鈎鞬假帶方心鞮履紛鞶囊雙佩
烏皮履六品以下去紛鞶囊雙佩三品以上有公爵者
嫡子之婚假絳冕五品以上子孫九品以上子爵弁庶
人婚假絳公服

初隋文帝聽朝之服以赭黃文綾袍烏紗帽折上巾六
合鞬與貴臣通服唯天子之帶有十三鐶文官又有平

頭小樣巾百官常服同於庶人至唐高祖以赭黃袍巾帶為常服腰帶者摺垂頭於下名曰鈍尾取順下之義一品二品鍔以金六品以上以犀九品以上以銀庶人以鐵既而天子袍衫稍用赤黃遂禁臣民服親王及三品二王後服大科綾羅色用紫飾以玉五品以上服小科綾羅色用朱飾以金六品以上服絲布交梭雙紉綾色用黃六品七品服用綠飾以銀八品九品服用青飾以鍮石勳官之服隨其品而加佩刀礪紛帨流外官庶

人部曲奴婢則服紬絹縹布色用黃白飾以鐵銅太宗時又命七品服龜甲雙巨十花綾色用綠九品服絲布雜綾色用青其後以紫為三品之服金玉帶銙十三緋為四品之服金帶銙十一淺緋為五品之服金帶銙十深綠為六品之服淺綠為七品之服皆銀帶銙九深青為八品之服淺青為九品之服皆鍮石帶銙八黃為流外及庶人之服銅鐵帶銙七

程氏演繁露曰韓退之詩不知官高卑玉帶垂金

魚若從國朝言之則極品有不得兼者然唐制不爾也唐制五品以上皆金帶至三品則兼金玉帶通鑑明皇開元初勅百官所服帶三品以上聽飾以玉是退之之客皆三品之上亦足詫矣宋朝玉帶雖出特賜須得閣門關子許服方敢用以朝謁則體益以重然唐裴晉公得特賜乃于闐玉也暨病亟具表返諸上方其自占辭曰內府之珍先朝所賜既不合將歸地下又不敢留在人間謹以上

進不知故事當進如隨身魚符之類邪抑晉公自
以意創此舉也宋朝親王皆服玉帶元豐中創造
玉魚賜嘉岐二王易去金魚不用自此遂為親王
故事又前世所未有者

按此紫緋綠青為命服昉於隋煬帝巡游之時而
其制遂定於唐此史傳所紀也然夏侯勝謂士若
明經取青紫如拾地芥揚子雲亦言紆青拖紫丹
朱其轂則漢時青紫亦貴官之服西漢服章之制

無所考見史言郊社祭服承秦制用袞元

袞紺色也

漢則百官之服皆袞元不聞以青紫如淳注雖有五時服至朝皂服皂衣皂衣即元服也豈服章雖用袞元而青紫乃其時貴官燕居之服非微賤者所可服歟

唐初士人以棠苧襴衫為上服貴女功之始也一命以黃再命以黑三命以纁四命以綠五命以紫士服襌褐庶人以白中書令馬周上議禮無服衫之文三代之制

有深衣請加襴袖襠襪為士人上服開胯者名曰缺胯
衫庶人服之又請裹頭者左右各三襠以象三才重繫
前脚以象二儀詔皆從之太尉長孫無忌又議服袍者
下加襴緋紫綠皆視其品庶人以白太宗嘗以幘頭起
於後周便武事者也方天下偃兵採古制為翼善冠自
服之又製進德冠以賜貴臣玉璫制如弁服以金飾梁
花趺三品以上加金絡五品以上附山雲自是元日冬
至朔望視朝服翼善冠衣白練裙襦常服則有袴褶與

手巾幘通用翼善冠進德冠制如幘頭皇太子乘馬則服進德冠九璫加金飾犀簪導亦有綉褶燕服用紫其後朔望視朝仍用弁服

朱子語錄問幘頭所起曰亦不知所起但諸家小說中班駁時見一二如王彥輔塵史猶畧言之某少時尚見唐時小說極多今皆不復存矣唐人幘頭初止以紗為之後以軟遂斫木作一山子在前襯起名曰軍容頭其說以為起於魚朝恩一時人

爭效之其先幞頭四角有脚兩脚係向前兩脚係
向後後來遂橫兩脚以鐵線張之然惟人主得裹
此世所畫唐明皇已裹兩脚者但比今甚短後來
藩鎮遂亦僭用想得士大夫因此亦皆用之但不
知幾時展得如此長五代時猶是惟人君得裹兩
脚者然皆莫可考也桐木山子相承用至本朝遂
易以藤織者而以紗冒之近時方易以漆紗嘗見
南溪沙漠一士夫家尚收得上世所藏幞頭猶是

藤織坯子唐製又有兩脚上下者亦莫可曉又曰
幘頭本是偃脚垂下要束得緊今却做長脚問橫
渠說唐莊宗取伶官幘頭帶之後遂成例曰不是
如此莊宗在位亦未能便化風俗無是伶人所帶
士大夫亦未肯帶之見畫本唐明皇已帶長脚幘
頭或云藩鎮僭禮為之後遂為此樣或云乃是唐
宦官要得常似新樣故以鐵線插帶中又恐壞其
帶以桐木為一幘頭骨子常令幘頭高起如新謂

之軍容頭後來士大夫學之令匠人為我斫個軍容頭來蓋以木為之故謂之斫及唐末宦者之禍人皆以此為讖王彥輔塵史說得有來歷恐是如此後來覺得不安到本朝時又以藤做骨子以紗糊其上後又覺見不安到仁宗時方以漆紗為之高宗給五品以上隨身銀魚袋以防召命之詐出內必合之三品以金飾袋垂拱中都督刺史始賜魚天授二年改佩魚皆為龜其後三品以上龜袋飾以金四品以

銀五品以銅龜袋始於魏唐改魚袋至武后改魚為龜
中宗初罷龜袋復給以魚郡王嗣王亦服金魚袋景龍
中令特進佩魚散官佩魚自此始也然員外試檢校官
猶不佩魚景雲中詔衣紫者魚袋以金飾之衣緋者以
銀飾之開元初駙馬都尉從五品者假紫金魚袋都督
刺史品卑者假緋魚袋五品以上檢校試判官皆佩魚
中書令張嘉貞奏致仕者佩魚終身自是百官賞緋紫
必兼魚謂之章服當時服朱紫佩魚者衆矣

按炙轂子魚袋古之算袋魏文帝易以龜取其先知歸順之義唐改以魚袋取其合魚符之義自一品至六品以下皆佩唐初卿大夫歿追取魚袋永徽中勅生平在官用為褒飾亡沒追收情所不忍五品以下亡歿隨身魚袋不追

顯慶元年長孫無忌等曰武德初撰衣服令天子祀天地服大裘冕按周郊被袞以象天戴冕藻十有二旒與大裘異月令孟冬天子始裘以禦寒若啓蟄祈穀冬至

報天服裘可也季夏迎氣龍見而雩如之何可服故歷代唯服衮章漢明章始采周官禮記制祀天地之服天子備十二章後魏周隋皆如之伏請郊祀天地服衮冕罷大裘又新禮皇帝祭社稷服絺冕四旒三章祭日月服元冕三旒衣無章按今文四品五品之服也三公亞獻皆服衮孤卿服毳驚是天子同於大夫君少臣多非禮之中且天子十二為節以法天烏有四旒三章之服若諸臣助祭冕與王同是貴賤無分也若降王一等則

王服元冕羣臣服爵弁既屈天子又貶公卿周禮此文
久不用矣猶祭祀之有尸侑以君親而拜臣子若族蠲
氏之職不通行者蓋多故漢魏承用衮冕今新禮親祭
日月服五品之服請循歷代故事諸祭皆用衮冕制曰
可無忌等又曰禮皇帝為諸臣及五服親舉哀素服今
服白袷禮令乖舛且白袷出近代不可用乃改以素服
自是驚冕以下天子不復用而白袷廢矣

武后延載元年五月內出繡袍以賜文武三品以上官

其袍文仍各有訓誡諸王飾以磐石及鹿宰相飾以
鳳池尚書飾以對鴈左右衛將軍飾以對麒麟左右
武衛飾以對虎左右鷹揚衛飾以對鷹左右千牛衛
飾以對牛左右豹韜衛飾以對豹左右玉鈴衛飾以
對鶻左右監門衛飾以對獅子左右金吾衛飾以對
豸又銘其襟帶各為八字迴文其詞曰忠正貞直崇
慶榮職文昌翊政勲彰慶陟懿冲順彰義忠慎光廉
正躬奉謙感忠勇

元宗開元四年二月制軍將在陣賞借緋紫本是從戎
缺髀之服一得之後遂別造長袍遮相倣效又入蕃使
則勅借緋紫者使迴合停自今以後衙內宜專定殿中
侍御史糾察

唐初賞朱紫者服於軍中其後軍將亦賞以假緋紫
有從戎缺髀之服不在軍者服長袍或無官而冒衣
綠有詔殿中侍御史糾察諸衛大將軍中郎以下給
袍者皆易其繡文千牛衛以瑞牛左右衛以瑞馬驍

衛以虎武衛以鷹威衛以豹領軍衛以白澤金吾衛以辟邪

八年勅諸笏三品已上前誥後直五品以上前誥後挫並用象九品以上任用竹木上挫下方聽依品爵報笏假版官者亦依此例

張九齡傳九齡體有蘊籍故事公卿皆措笏於帶而後乘馬九齡獨常使人持之因設笏囊自九齡始

德宗貞元十五年膳部郎中歸崇敬以百官朔望朝服

袴褶非古禮上疏云按三代典禮兩漢史籍並無袴褶之制亦未詳所起之由隋代以來始有服者請罷之詔可

按袴褶魏晉以來以為車駕親戎中外戒嚴之服晉制雖有其說而不言其制然既曰戒嚴服之必戎服也至隋煬帝時巡游無度詔百官從行服褶袴軍旅間不便遂令改服戎衣為紫緋綠青之服則所謂袴褶者又似是褒衣長裾非鞍馬征行所

便者與戒嚴之說不類唐時以袴褶為朝見之服
開元以來屢勅百官朝參應服袴褶而不服者令
御史糾彈治罪蓋以為六品以下之通服韻書訓
褶為袴又為袷也然袴裳也袷衣之交領也則不
知所謂袴褶者一物乎二物乎唐輿服志羣臣服
條內有緋褶大口袴則似是二物然不知所謂緋
褶者衣乎裳乎當俟精識考古之士而訂之

復考畢仲行中書備對冕服條下袴褶注云紫緋

綠各從本服白綬中單白羅方心曲領白綾袴本品官導駕則騎而從之詳其說所謂紫緋綠即後來之公服而非祭服朝服也

祭服青衣朝服緋衣不分紫緋綠三等

但所謂白綬者今之公服所無而中單白羅方心曲領後之衣公服者亦未嘗服之蓋古人盛服必有中單冕弁朝祭之服皆有之多以白為之而緣以朱繡之屬意公服之初制亦必有此後來流傳既久寢從簡便而朝服之裏所衣者非中單乃流

俗不經之服如所謂紫袍皂褶之類是也



文獻通考卷一百十二